

蘇州府志

卷四十一



蘇州府志卷第六十八

名宦一

周

伍員

黃歇

唐

狄仁傑

閻濟美

薛萃

李德裕

宋

王贄

張綸

任中正

趙賀

中國社會科學院
藏書

段少連

陳桷

周興裔

趙子瀟

方滋

鄭興裔

潘時

劉穎

呂廣問

徐誼

孫瑜

沈鎬

无珏

章服

陳良翰

陳峴

顏師魯

羅點

詹體仁

黃灝

留恭

劉燾

趙舉夫

趙伸夫

毛鼎新

曹幽

丁勝

陳塤

馬光祖

李芾

胡穎

孫子秀

陳振孫

唐震

元

游顯

劉宣

史弼

雷膺

忙兀台

管如德

徹里

韓鏞

呂思誠

瞻思

張庭珪

徐珍

蘇天爵

樊執敬

明

黎光

夏原吉

虞謙

陳遜

周忱

羅汝敬

鄧棨

王來

黃琛

翁世資

陳泰

鄒來學

李秉

崔恭

徐賈

劉孜

滕昭

王恕

劉魁

侶鍾

朱瑄

李充嗣

尤時熙

翁大立

任環

周如斗

曹邦輔

歐陽鐸

郭宗皋

海瑞

宋儀望

周孔教

周起元

祁彪佳

馮元颺

張國維

路振飛

黃希憲

凌義渠

國朝

秦世禎

周國佐

郎賽

李森先

韓世琦

簡上

馬祐

慕天顏

方國棟

湯斌

宋犖

王繻

張伯行

鄂爾泰

尹繼善

馮景夏

徐士林

陳宏謀

明德

長麟

費淳

岳起

林則徐

裕謙

吉爾杭阿

徐有壬

劉卹膏

林國華

曹郡


周鼎

翁士林

氏繼善

宋華

宋華



蘇州府志卷六十八

名宦一

周時錄吳楚二臣
餘皆歷代節使

郡縣志之紀名宦猶史家之傳循吏也循吏必實有功德

於民名宦亦如之舊志或有官階而無政績或有政績而

非官蘇時之政績皆屬不倫而道光志載高其倬以下諸

督部此當入江南通志或江甯府志屢入蘇州府志尤非

體例學政亦不應載惟其事有關蘇郡者分別存焉

周

伍子胥楚人名員父奢兄尙爲楚平王所殺胥亡奔吳吳王闔

閭以爲行人與謀國事西破強楚北威齊晉南服越人後越



王句踐敗吳於姑蘇闔閭病創死子夫差立敗越於夫湫越使大夫種厚幣遺吳太宰嚭請和吳王許之胥諫不聽後王

聽嚭讒賜胥屬鏹之劍以死吳人憐之為立祠於江上史記宋

蔡京廟記曰昔吳瀕海建國特水作險內虞泛濫外關守禦

自子胥相土味水築置城郭實倉廩治兵庫闢門二八以象

風卦始能啟塞有時疏導無壅除昏墊蕩析之虞而存抱關

擊柝之警更祀幾百歷載踰千其城域門號至今因之而不

變是子胥嘗能安我民也不顧小義卒雪大恥勇於納諫以

至殉身二者皆昔人之所難昔日之不死蓋以為父今日之

死蓋以為君由前足以教孝由後足以教忠是子胥嘗能教

吾民也京人雖非其言則是康熙志入人物忠義類乾隆志

移列名宦之首

黃歇楚人楚考烈王元年以歇為相封春申君賜淮北地後請

封江東因城故墟以自為都邑相楚二十二年就封於吳

行相事考烈王卒李園伏死士刺殺春申君滅其家史記乾隆志

曰吳郡志以春申君即城隍神據史傳事楚事蹟有可議其

城吳墟為大都廟食後世蓋必有造於此邦者今仍姑蘇志

之錄

唐 狄仁傑字懷英太原人高宗時拜冬官侍郎持節江南巡撫使

吳楚俗多淫祀仁傑一切毀之止留夏禹太伯季札伍員四

祠唐書

閻濟美貞元末由婺州刺史為福建觀察使徙浙西為治簡易

居鎮未嘗增常賦唐書

薛萃寶鼎人累官湖南浙東觀察使以理行遷浙江西道觀察

使廉風俗守法度人甚安之理身儉薄常衣一綠袍十餘年
不易因加賜朱紱然後解去萃厯三鎮凡十餘年家無聲樂
俸祿悉以散諸親族故人子弟除左散騎常侍致仕

舊唐書

李德裕字文饒吉甫子太和中厯浙西觀察使初南方信祲祥
雖父母癘疾子棄不敢養德裕擇長老可語者論以孝慈大
倫患難相收不可棄之義使歸相曉敕違者顯寘之法數年
惡俗大變毀淫祠撤私邑山房千四百舍寇無所度蔽天子
下詔褒焉敬宗立詔浙西上脂盞妝具德裕奏比年旱災物
力未完今所須脂盞妝具度用銀二萬三千兩金百三十兩
物非土產雖力營索尙恐不逮願宰相議何以俾臣不違詔

旨軍興不疲人不欲怨則前敕後詔咸可遵承又詔索盤縹

繚綾千匹復奏言盤

縹

文彩怪麗唯乘輿當御今廣用千匹

臣所未喻優詔為停自

和後禁毋私度僧徐州王智興給

言天子誕月請築壇度人以資福德裕劾智興募願度者人

輸錢二千不復勘詰普加髡落自淮而右戶三丁男必一男

剔髮規影徭賦所度無算臣閱渡江者日數百蘇常齊民十

固八九若不加禁遏則前至誕月江淮失丁男六十萬不為

細變有詔禁止

唐書

宋

王贄太宗時為兩浙轉運使初錢氏國除而田稅尙仍其舊畝

稅三斗浙人苦之太宗乃遣贄均兩浙雜稅贄悉令畝稅一斗使還大臣有責其增減賦額者贄謂稅一斗天下之通法

兩浙既已為王民豈可復徇偽國之制上從其說浙人至今

便之中吳紀聞又云轉運衙舊在蘇州治之西偏

張綸字公信潁州人太宗時江淮發運使疏五渠以導太湖民

利之宋史

任中正字慶之濟陰人太宗時為兩浙轉運使民饑中正不俟

詔發廩賑之累遷禮部尚書卒諡康懿姑蘇志

趙賀字餘慶封邱人真宗時為江淮制置發運使蘇州太湖塘

岸壞及並海支渠多淹廢水侵民田詔賀與兩浙轉運使徐

奭兼領其事伐石築隄浚積潦自吳江東赴海民歸占者二

萬六千戶出苗租三十萬宋史

段少連字希逸開封人仁宗時為兩浙轉運副使舊使者所至

郡縣索簿書不暇殫閱往往委之吏胥吏胥持以為貨少連

命郡縣上簿書悉緘識遇事間指取一二自閱擿其非是者

按之餘不及閱者全緘識以還由是吏不能為姦而州縣簿

書莫敢不治部吏有過召詰曰聞子所為若此有當告我我

容汝自新苟以為無我不使善人被謗即為汝辨明矣吏不

能欺皆以實對少連每得其情諄諄戒飭使去後有能改過

者猶保任之宋史

孫瑜字叔禮博平人以父誼任歷官秘閣校理除兩浙轉運使

先是郡縣倉庾以斗斛大小為姦瑜奏均其制黜吏之無狀

者民大喜有言其變新器非便下遷知曹州尋有言瑜所作

量法均一誠便者乃還其元資宋史

陳稱字季任温州平陽人紹興五年除直龍圖閣知泉州明年

改兩浙西路提刑乞置鄉縣三老以厚風俗凡宮室車馬衣

服器械定為差等重侈靡之禁八年遷福建路轉運副使宋史

季任宋史作李壬此從盧志

沈錡字德侔德清人徽宗時進殿中侍御史蔡京興蘇州錢獄

株連者千餘人帝憐非辜復命錡與蕭服吳郡志更有姚其來往勘京

啖以顯仕錡至吳即日決釋無左驗者七百人歎曰為天子

耳目而可附會權要殺人以苟富貴乎遂閱實平反以聞京

大怒坐貶宋史中吳紀聞初城中小兒羣唱云沈逍遙莫知其由已而三御史果至

周興裔字克振道州人頤四世孫以和州觀察使扈蹕南渡建

炎三年特授武功大夫權兩浙淮東南路□□使領侍衛馬

軍開闢平江鎮沿海死難福山賜葬虞山北麓子孫遂家焉

同治常昭志稿引言志

王珏字德全荆公安石孫紹興二年起家鹽官丞秀州歲以錢

給亭民煮鹽至十五年積十九萬七千餘緡不給民訴於朝

除珏提舉浙西茶鹽逾年盡償亭民且贏鉅萬開華亭海河

二百餘里鹽滋得流通且資以溉田經界法行甚害者三百六十餘事其七千二百餘戶為尤病珏奏除之兼提點刑獄未閱月正大辟重而輕者三人死而生者五人移湖南提舉官至直敷文閣太府少卿隆慶二年卒於吳縣橫山之私第

盧志 案宋無隆慶年號俟考

趙子瀟字清卿秦康惠王後孝靖公奧子高宗時為兩淮轉運副使時議者言田之竝太湖者被水害宜分道諸浦注之江詔子瀟往案視還言太湖當數州巨浸豈松江一川所能獨泄昔人於常熟開浦二十四以達大江又開浦十於崑山東南以入海今皆湮塞宜加疏浚從之遂浚常熟東柵至雉浦

入於涇谷又疏鑿福山塘至尙市橋北注大江分殺其勢水

患用息

宋史

章服字德文永康人以詞賦登進士第紹興末知鄂州除浙西提舉漕司嘗貸緡錢二萬已數年服立移督之而戶部復請貸三萬銜命少校恥不即得出不遜語服叱之曰此聖旨耶常平民命也猶當以法奏覆汝何敢爾明年召為吏部員外

郎

盧志

方滋字務德嚴州桐廬縣人乾道改元除兩浙轉運副使罷敵使夜行火燉去二十之弊除權刑部侍郎刑法用例稍弊已詔自是不得奏裁滋謂奏裁有定法願依建隆舊制若法所

不可勿許濫奏上從之吳郡所全宥蓋四十人八年知紹興府徙知平江府既入見上曰卿為佳部多矣平江久弊其為

我整之滋猶言會稽和賣之弊上嘉納至郡數日進敷文閣

學士提舉江州太平興國宮卒年七十有一

韓元吉墓誌銘

陳良翰字邦彥臨海人乾道三年自提點江東刑獄移浙西四

年五月以賊盜肅清特轉左朝請郎十一月召為宗正少卿

吳郡志

鄭興裔字光錫開封人顯肅皇后外家三世孫也初以恩授成

忠郎累差浙東提刑易浙西以郡縣積玩檢驗法廢擲為格

日分畀屬縣吏不得行其姦因著為令徙江東請祠歸

盧志案

宋史本傳檢驗格目係福建提刑時事附識俟考

陳峴字舉善以詞學擢第拜中書舍人淳熙初為浙西提舉以

措置支還亭戶本錢及增買鹽袋興修水利有勞除直敷文

閣兩浙轉運判官

盧志

潘時字德鄰上虞人淳熙中知興化軍召對除浙西提舉至則

罷中都饋餉之不如法者豪貴多不樂而平江庫錢失陷守

誣富室以取償一郡大擾有致死者時檄罷之守怨時陰以

禁兵給白直而誅他司上其事時坐削一官移江西未行又

易江東

盧志

顏師魯字幾聖龍溪人紹興中進士第歷國子丞除江東提舉

改浙西役法弊甚細民至以雞豚鬻榻折產力遇役輒破家
師魯下教屬邑預正流水籍稽其役之序寬比限免代輸咸
便安之鹽課歲百萬本錢久不給亭竈私鬻禁不可止刑辟
日煩師魯搏帑緡盡償宿負戒官吏毋侵移比旁路課獨最
上謂執政曰儒生能辦事如此予職直秘閣農民有墾曠土
成田未及受租者奸豪多爲已利師魯奏但當正其租賦不
應繩以盜種法失劭農重本意奏可遂著爲令宋史

劉穎字公實衢州西安人紹興二十七年進士歷知鉛山常熟
二縣常熟素繁劇穎降心條理更以治稱召監進奏院歷太
常丞兼兵部郎官提舉浙西常平還澱山湖以泄吳松江之

水禁民侵築毋使逼塞大流民田賴之又奏備糴本廢圍田
二事不果行就遷提刑以洗冤澤物爲任問詣獄察不應繫
者縱遣之御史以介僻劾罷盧志

羅點字春伯崇仁人淳熙中由校書郎除浙西提舉規畫荒政
凡數十奏躬行畝畝實惠甚博先是崑山華亭之間有澱山
湖洩諸水道戚里豪強之家占以爲田水由是壅點廉得其
實奏請開濬且爲圖以獻上從其言百姓勇於赴功不日而
畢所濟田百萬畝乃刻石著其事以防他日築塞之患民甚
便之平江酒官程師禮常爲知府王希呂所督過及罷郡官
吏餞別師禮攘臂搆之點上言曰朝廷進退羣臣自有典章

師禮敢肆無狀非所以示眾庶也乞黜之以正名分上允其請權府事凡四閱月時久旱請雨點獨致敬於祀典郡之天慶觀有何蓑衣道人異時為郡者以為神每禱祀畢或就見焉點不往何以杖擊僚吏車以斥辱之點視之漠然俄大雨隨車郡人大喜又有故主訟去僕負債者究得其實而僕甚點反欲汙讎其主自陳普通其主饋之妾物色之則無有也點遂令僕自供姦狀竟從姦罪決配其女使候主人有詞日根究問者無不痛快盧志

呂廣問字仁甫宣和七年進士孝宗時由提舉江南東路常平茶鹽公事移浙西路入對言常平錢穀自軍興多用之以法

嚴故不上聞今虛數未除恐緩急誤指揮上為遣使覈其實

遷本路提點刑獄兼權湖州除直秘閣兩浙轉運副使異時

漕臣多媚說上下媒進取廣問獨屹屹無依倚而人亦不敢

干以私韓元吉墓誌銘

詹體仁字元善浦城人光宗即位提舉浙西常平務為民除害

興利謂浙右之有漕渠非止通饋運資國信往來而已蘇秀

常潤田之高仰者實賴之於是開漕渠浚練湖置斗門為旱

潦備又以餘力立舉子倉創安濟院所活不可勝紀散鹽本

錢數萬紓亭戶之力歲終課利增羨盧志

徐誼字子宜一字宏父温州人乾道八年進士累官太常丞知

徽州移提舉浙西常平嘗論水利之切於時者曰昔下流不疏而水上溢故鑿直曲港還三江故道開宜興百瀆所以順導下流也惟高原田徑乃濶隘之爾昔之言水如單鍔郊直皆是也今開吳松江下流與宜興百瀆屬之海者無慮數十百所異時浦港磬折以趨海今近浦之民多取徑直疏決蘇湖常秀舊爲澤國比年雨或後至種且不入蓋圍田眾而疏導多也小人見利不畏其害圍於淺水既爲高田圍於茭蕩既爲稻田一俱不已復有下脚始之重陂大半爲平始之良田背水自曬十日不雨農廢作業然且承用舊說又將疏之失利害之實矣故舊田溝澮當濬治圍田下脚無輒開已開

未填當捺合今之言水者能行是三說則高原舊田還爲沃

衍而農不病矣

盧志

黃灝字商伯都昌人擢進士第歷太府寺丞出知常州提舉本路常平海鹽民伐桑柘毀屋廬葺礎盈野或食其子持一臂行乞而州縣方督促逋欠時有旨倚閣夏稅灝遂併乞閣秋苗不俟報行之言者罪其專移筠州尋削兩秩而從其蠲閣之請灝既歸田里若素隱者起知信州改廣東提刑不赴卒

宋史

留恭字伯禮永春人丞相正次子歷右曹郎官提舉浙西常平境內大飢畢力賑卹全活三十六萬六千餘人知紹興府時

稱循吏

盧志

劉燭字晦伯建陽人寧宗時遷浙西提點刑獄巡按不避寒暑多所平反有殺人而匿權家者吏弗敢捕燭竟獲之遷國子

司業

宋史

趙懋夫字惟恭處州人嘉定十五年以浙西提刑兼權平江府有婦告其姑私酒懋夫追姑從條勘罪復問婦曰汝事姑孝乎云極孝順懋夫曰既能盡孝可代姑受杖又有僕為主人所訟欲加玷辱乃自供與主母通懋夫判云在法奴姦主母罪合流配今某不待勘證已自供析當從條決配主家訴其悖慢則克狡可知所犯主母強而非和免行追究令自省循

又一民家稍盈實再從兄弟貪而無行嘗從其借屋居止不復還凡所需求必期滿欲怨詈不逞妄訴其同產未分懋夫究證其妄未幾迫於寒餓投水死預書族人違法數事束之腰間又皆撰造虛詞逮委官取尸驗視初無傷損遂繳申所書懋夫判生前窮窘無賴妄訴族人死後陳述有司亦難理斷喻其民量與葬資郡人莫不稱頌入朝拜刑部郎中

盧志

趙伸夫字信道魏悼王七世孫紹熙元年進士嘉定中由金部

郎官除直敷文閣兩浙路轉運判官究心民事深知州縣催

科至為民病建臺之始揭三大弊嚴行約束鏤榜著明所在

觀者舉手加額將及二年不動聲色而條教自孚不待督促

而財用自足得人之效爛然可觀

袁燮墓誌銘

毛鼎新字新甫黃巖人歷與國軍教授浙西提舉茶鹽司準遣

改常平司準遣其長有欲獻羨餘四十萬者鼎新力爭以置

社倉又有賣獄者復力爭得直無錫民獻缺役田入和靖書

堂者又力爭役得不廢居官精密所至有能名

盧志

曹翬字西士瑞安人嘉泰五年進士歷秘書丞出為浙西提舉

常平面陳和籜折納之儼建虎邱書院以祀尹焞移浙東提

刑召為左司諫與王萬郭磊卿徐清叟俱負直聲時號嘉熙

四諫卒諡文恭

盧志

丁勝嘉熙間以功授浙西總管平江駐劄勝起自羣盜知府史

宅之每侮之勝曰丁勝是作賊後來作官尚書作官了卻來

作賊宅之自此不復輕之淳祐初馬光祖為畿憲會部內有

巨寇許大四聚眾作亂州縣大擾而憲司首議勝勦捕勝力

辭行光祖謂其畏怯勝曰昔光武見大敵勇見小敵怯今賊

勢叵測而先遣一總管萬一不利後使何人光祖始服

姑蘇志

陳塤字和仲鄞人歷福建轉運判官遷浙西提刑歲旱盜起捕

斬之盜懼徙去後知温州未上以言罷卒於家塤初官浙西

令官屬各以本司利害為一書新任者具腳色申狀外不用

啟劄其後馬光祖繼之亦有此例人皆躋之

盧志

馬光祖字華父金華人由浙東提舉常平移浙西提刑權浙西

常平遷浙西安撫使會歲饑榮王府積粟不發虞光祖謁王辭以無粟光祖探懷中文書曰某莊某倉若干王語塞遂得

粟活民甚多進同知樞密院事多諡莊敏光祖在外練兵豐

財朝廷賴之為京尹朝治浩穰風績凜然盧志參 姑蘇志

李芾字叔章衡州人理宗時累遷浙西提刑時浙西多次盜羣穴

太湖中芾跡得其出沒接捕之盜駭散先是虎邱有書院以

祠尹焞芾為修朔置學官親為約規以教之學者甚盛咸淳

八年入知臨安府宋史參 盧志

胡穎字叔獻湘潭人紹定五年登進士第歷知平江府兼浙西

提刑穎為人正直剛果臨政善斷不畏強禦在浙西榮王府

十二人行劫悉斬之一日輪對理宗曰聞卿好殺意在浙獄

也穎曰臣不敢屈太祖之法以負陛下非嗜殺也帝為之默

然宋史

孫子秀字元實餘姚人紹定五年進士調吳縣主簿有妖人稱

水仙太保知府王遂將使治之莫敢行子秀奮然請往焚其

廬碎其像沈其人於太湖曰實汝水仙之名矣妖遂絕日詣

學宮與諸生討論義理辟淮東總領所中酒庫開慶元年為

浙西提舉常平先是丞相丁大全以私人為之盡奪亭民鹽

本錢充獻羨之數不足則估籍虛攤一路騷動亭民流亡子

秀還前政鹽本錢五十餘萬貫奏省華亭茶鹽分司官定衡

量之非法多取者於是流散復業徒提點刑獄兼知常州淮
 兵數百人浮寓貢院給餉不時死者相繼子秀請於朝劾名
 忠衛軍置砦以居截撥上供贍之盜劫吳大椿前使者諱其
 事誣大椿與死子焞爭財自劫其家追毀大椿官編置千里
 外徙黥其臧獲子秀廉得實悉平反之尋以兼郡則行部非
 便得請專臬事擊貪舉廉風采凜然進大理少卿累遷湖南
 轉運副使以迎養非便辭復移浙西提刑冒暑周行八郡三
 十九縣獄為之清初獄訟之滯皆由期限之不應使者下車
 或親書戒州縣勿違而違如故則怒之怒之改匣又違則又
 重怒之至再三而專卒四出巡尉等司繳限抱匣費不資則

其勢必違子秀與州縣約到限者竟詣庭下吏不能要素亦
 無違者其後剏循環總匣屬各州主管官凡管內諸司報應
 皆併入匣一日一遣公移則又總實於匣以往於是事無大
 小纖悉畢具而風聞者反謂專卒凌州縣劾罷之子秀笑而

已

宋史

陳振孫字伯玉安吉人博通今古為浙西提舉仰體祖宗卹民
 之意舉行萬戶停廢醋庫邦人至今德之

盧志

唐震字景實會稽人咸淳六年擢浙西提刑過闕陛辭賈似道
 以類田屬震震謝不能行至部又以疏力爭之趙氏有守阡
 僧甚暴橫震遣吏捕治似道以書營救震卒按以法似道怒

使侍御史陳堅劾去之

宋史

元

游顯字子明汴州人至元十二年隨伯顏下平江入城撫治軍

民興復學校恤問孤寡民受其賜後除浙西宣慰使

姑蘇志

劉宣字伯宣太原人至元十二年為行省郎中從丞相伯顏平

章阿朮平江南贊書居多除知松江府未幾同知浙西宣慰

司事在官五年威惠並著陞江淮行省參議後以集賢學士

除行臺御史中丞江浙行省丞相忙古臺悍戾縱恣常慮臺

臣糾之尤忌宣因嗾其黨誣以事朝廷遣官鞫問宣就逮自

剄於舟中宣忠義節操為世所重聞者莫不悲悼

元史

史弼字君佐一名塔刺渾博野人以材勇見世祖給事左右從

伯顏南征以功進定遠大將軍累遷江淮行省參政改浙西

宣慰使二十一年春霖雨米價湧貴弼即發米十萬石平價

糶之而後聞於省省欲增其價弼曰吾不可失信寧輟我俸

以足之省不能奪益出十萬石民得不飢改淮東宣慰使官

至平章政事

元史

雷膺字彥正渾源人至元二十三年授江南浙西道提刑按察

使時蘇湖多雨傷稼百姓艱食膺請於朝發粟二十萬石賑

之江淮行省以發粟太多議存三之一膺曰宣布皇澤惠養

窮困行省臣職耳豈可效有司出納之吝耶行省不能奪悉

給之元史

忙兀台蒙古達達兒氏從伯顏阿朮南征有功制授行兩浙大

都督府事四遷為江淮行省平章政事未幾拜行省左丞相

還鎮江浙時浙西大飢乃弛河泊禁發府庫官貨抵其直買

粟以賑之居六年召還姑蘇志

管如德黃陂人宋平遷浙西宣慰使上時政五條以權臣抑不

得達後丞相阿塔海命馳驛奏出征事入見世祖問曰江南

之民得無有二心乎如德曰往歲旱澇相仍民不聊生今累

歲豐稔民沐聖恩多矣敢有二志使果有之臣亦不敢飾辭

以欺陛下帝善其言卒官江西尚書省左丞諡武襄姑蘇志

徹里燕只吉台氏大德元年拜江南諸道行臺御史大夫改浙

江行省平章政事江浙稅糧甲天下平江嘉興湖州三郡當

江浙十六七而其地極下水鍾為震澤震澤之注由吳松江

入海歲久江淤豪民封土為田水道淤塞由是浸淫泛溢敗

諸郡禾稼朝廷命行省疏導之發卒數萬徹里董其役四閱

月畢工元史

韓鏞字伯高濟南人天曆元年除僉浙西廉訪司事擊奸暴黜

貪墨特舉烏程尹干文傳所至郡縣為之肅然三年轉江浙

財賦副總管元史

呂思誠字仲實平定州人泰定元年進士歷僉廣西廉訪司事

移浙西達識帖睦邇時為南臺御史大夫與江浙省臣有隙
嗾思誠劾之思誠曰吾為天子耳目不為臺臣鷹犬也不聽

已而聞行省平章左吉貪墨乃疏其罪流之海南

元史

瞻思字得之真定人後至元三年除僉浙西肅政廉訪司事即

按問轉運使海道諸萬戶行宣政院等官贓罪浙右郡縣無

敢為貪墨者復以浙右諸僧寺私蔽猾民有所謂道人道民

行童者類皆瀆常倫隱徭殺使民力日耗契勘嘉興一路已

二千七百人乃請勒歸本族俾供王賦朝廷是之著為令瞻

思歷官臺憲所至以理究澤物為已任平反大辟之獄甚眾

然未嘗故出人罪以市私恩

元史

張庭珪字國珍北京人後至元十四年監郢復二州陞嘉議大

夫監平江路位總管上郢復民間其去遮馬號送萬數其治

平江考績亦最他路

姚燧誌墓

徐琰字子方為浙西廉訪使遇有訴訟者必歷問其郡邑官吏

臧否分為三等載諸集第一等純臧者第二等臧否相半者

第三等極否者又用覆察相同候分司按巡時遂以畀之曰

第一等褒舉之第二等勿問第三等懲戒之使改可也慎勿

罷其職役分司遵奉一道肅清時治所向在平江有旨遷置

於杭歲莫擇日啟行一書吏合受稽違罪責公謂曰正旦在

邇候明年分司施行可也庭下歡聲如雷長厚之道類如此

卒諡文獻 輟耕錄兩條合纂

蘇天爵字伯修真定人至正七年為江浙行省參政條分目別
鉅細不遺九年以疾歸復起為兩浙都轉運使十二年妖寇
自淮右蔓延江東詔仍為江浙參政總兵於饒信克復之功
雖宿將不能過之博學知要長於紀載著述甚多 姑蘇志
樊執敬字時中鄆城人至正十七年授江浙行省參政十二年
督海運於平江將發宴犒於海口俄有客船至驗其券信令
入不虞為寇也既入港即縱火鼓譟時變起倉猝軍民擾亂
賊焚舟劫糧以去執敬走入崑山自咎不解及還省賊犯餘
杭執敬方被命討賊海上至是事急不得去與賊巷戰射死

賊七人賊勢方盛執敬中鎗死事聞贈翰林學士承旨榮祿

大夫柱國追封魯國公 姑蘇志

明

黎光東莞人以鄉薦拜御史巡蘇州請賑水災全活甚眾 明史周楨

傳

夏原吉字維喆湘陰人成祖即位為戶部尚書浙西大水有司
治不效永樂元年命原吉治之尋命侍郎李文郁為之副復
使僉都御史俞士吉齎水利書賜之原吉請循禹三江入海
故蹟濬吳淞江下流上接太湖而度地為閘以時蓄洩從之
役十餘萬人原吉布衣徒步日夜經畫盛暑不張蓋曰民勞

吾何忍獨適事竣還京師言水雖由故道入海而支流未盡
 疏洩非經久計明年正月原吉復行浚白茆塘劉家河大黃
 浦大理少卿袁復為之副已復命陝西參政宋性佐之九月
 工畢水洩蘇松農田大利三年還其夏浙西大饑原吉率俞
 士吉袁復及左通政趙居任往賑之發粟三十萬石給牛種
 有請召民佃水退淤田益賦者原吉馳疏止之姚廣孝還自
 浙西稱原吉曰古之遺愛也尋召還理部事

明史

虞謙字伯益金壇人以副都御史督兩浙蘇松諸郡賦運建議
 丁多糧最少者運北京次少者運徐州丁糧等運南京淮安
 丁少糧多存留本土民利賴之

明史

陳遜字必恭福建浦城人永樂十二年進士擢監察御史巡按
 吳中蘇松奸民唐全等聚無賴行劫官軍不能制遜以計捕
 千餘人民賴以安仕至雲南右布政卒於官囊無遺資都督

沐昂為具棺斂還鄉

康熙志

周忱字恂如吉水人永樂二年進士選庶吉士歷刑部主事員
 外郎越府長史宣德五年九月帝以天下財賦多不理而江
 南為甚蘇州一郡積逋至八百萬石思得才力重臣往釐之
 乃用大學士楊榮薦遷忱工部右侍郎巡撫江南諸府總督
 稅糧始至召父老問逋稅故皆言豪戶不肯加耗并徵之細
 民民貧逃亡而稅額益缺忱乃創為平米法令出耗必均又

請敕工部頒鐵斛下諸縣準式革糧長之大小出入者舊例糧長正副三人以七月赴南京戶部領勘合既畢復齎送部往返資費皆科斂充之忱止設正副各一人循環赴領訖事有司類收上之部民大便忱見諸縣收糧無團局糧長即家貯之曰此致逋之由也遂令諸縣於水次置團國設糧頭團戶各一人名轄收至六七萬石以上始立糧長一人總之名總收民持帖赴團官為監納糧長但奉期會而已置撥運綱運二簿撥運記支撥起運之數預計所運京師通州諸倉耗以次定支綱運聽其填注剝淺諸費歸以償之支撥羨餘存貯在倉曰餘米次年餘多則加六徵又次年加五徵初太祖

平吳盡籍其功臣子弟莊田入官後惡富民豪并坐罪沒入田產皆謂之官田按其家租籍征之故蘇賦比他府獨重官民田租共二百七十七萬石而官田之租乃至二百六十二萬石民不能堪時宣宗屢下詔減官田租忱乃與知府況鍾曲算累月減至七十二萬餘石他府以次減民始少甦七年江南大稔詔令諸府縣以官鈔平糴備賑貸蘇州遂得米二十九萬石故時公侯祿米軍官月俸皆支於南戶部蘇松民轉輸南京者石加費六斗忱奏命就各府支給與船價米一斗所餘五斗通計米四十萬石有奇并官鈔所糴其得米七十萬餘石遂置倉貯之名曰濟農賑貸之外歲有餘羨凡綱

運風漂盜奪者皆借給於此秋成抵數還官其修圩築岸開河濬湖所支口糧不責償耕者借貸必驗中下事力及田多寡給之秋與糧并賦凶歲再賑其姦頑不償者後不復給定為條約以聞帝嘉獎之終忱在任江南數大郡小民不知凶荒兩稅未嘗逋負忱之力也時漕運軍民相半軍船給之官民則儼舟加以雜耗率三石致一石往復經年失農業忱與平江伯陳瑄議民運至淮安或瓜洲水次交兌漕軍運抵通州淮安石加五斗瓜洲又益五升其附近并南京軍米過江者即倉交兌加與過江米二斗襯墊蘆蓆與折米五合兌軍或後期阻風則令州縣支贏米設廠於瓜洲水次遷米貯之

量支餘米給守者由是漕費大省民間馬草歲運兩京勞費不訾忱請每束折銀三分南京則輕齎卽地買納京師百官月俸皆持俸帖赴領南京米賤時俸帖七八石僅易銀一兩忱請檢重額官田極貧下戶兩稅準折納金花銀每兩當米四石解京兌俸民出甚少而官俸常足嘉定崑山諸縣歲納布疋重三斤抵糧一石比解以縷粗見斥者十八九忱言布縷細必輕然價益高今既貴重勢不容細乞自今不拘輕重務取長廣如式從之各郡驛馬及一切供帳舊皆領於馬頭有耗損則馬頭橫科補買忱命田畝出米升九合與秋糧俱征驗馬上中下直給米正統初淮揚災鹽課虧敕忱巡視奏

令蘇州諸府撥餘米一二萬石運揚州鹽場聽抵明年田租
竈戶得納鹽給米時米貴鹽賤官得積鹽民得食米公私大
濟九載秩滿進立侍郎忱素樂易先是大理卿胡概爲巡撫
用法嚴忱一切治以簡易告訐者輒不省或面訐忱公不及
胡公忱笑曰胡卿救旨在祛除民害朝廷命我但云安撫軍
民委寄正不同耳旣久任江南與吏民相習若家人父子每
行村落屏去騶從與農夫餉婦相對從容問所疾苦爲之商
略處置其馭下也雖卑官冗吏悉開心訪納遇長吏有能如
況鍾及松江知府趙豫常州知府莫愚同知趙泰輩則推心
與咨畫務盡其長故事無不舉嘗詣松江相視水利見嘉定

上海間沿江生茂草多淤流乃濬其上流使崑山顧浦諸所
水迅流駛下壅遂盡滌暇時以匹馬往來江上見者不知其
爲巡撫也歷宣德正統二十年間朝廷委任益專兩遭親喪
皆起復視事忱以此益發舒見利害必言言無不聽其因災
荒請蠲貸及所陳他利病無算小者用便宜行之無所顧慮
久之見財賦充溢益務廣大修葺解舍學校先賢祠墓橋梁
道路寺觀贈遺中朝官資餉過客無稍吝惜胥吏漁蠹其中
亦不甚嘗省以故屢召人言九年給事中李素等劾忱妄意
變更專擅科斂忱上章自訴帝以餘米旣爲公用置不問先
是奸民尹崇禮欲撓忱法奏忱不當多徵耗米請究問倉庫

主者忱因罷前法既而兩稅復通民無所賴咸稱不便忱乃
奏案崇禮罪舉行前法如故再以九載滿進工部尙書仍巡
撫景泰初始致仕當時言理財者無出忱右其治以愛民爲
本所張弛變通皆可爲後法諸府餘米數多至不可校公私
饒足忱既去帝命李敏代之敕無輕易忱法然自是戶部括
所積餘米爲公賦儲備蕭然其後吳大饑道殣相望課逋如
故矣民益思忱不已卽生祠處處祀之景泰四年十月卒諡
文襄

明史

羅汝敬吉水人永樂中爲工部侍郎奉使看詳蘇郡歲賦二百
八十餘萬天下無與比而郡民徵運不勝困弊卒之力不能

繼官存其數實未始足列請於朝得減常賦三分爲數七十
萬宿逋得清久之戶部復舉舊負況太守鍾抗言之有失信
於民之語詔復賜免自是民稍弛然富室田多輕額其重者
多屬貧下貧下猶疲弊望均一之惠繼乃得陳泰

姑蘇志

鄧棨字孟擴南城人永樂末年進士授監察御史奉敕巡按蘇

松諸府期滿將代去父老赴闕乞留得請旋以憂去後爲右

副都御史死土木之難贈右都御史諡襄敏

明史

王來字原之慈谿人宣德六年以御史出按蘇松常鎮四府命
偕巡撫周忱考察屬吏敕有請自上裁語來言賊民吏去之
唯恐不速必請而後行民困多矣帝爲改敕賜之中官陳武

以太后命使江南橫甚來數抑之武還愬於帝帝問都御史顧佐巡按誰也佐以來對帝歎息稱其賢及報命獎諭甚至

明史

黃琛字廷獻福建延平人正統四年進士授戶部主事尚書金濂以琛耿介有為最所器重嘗檄清理糧儲於蘇松等郡蘇松自周忱巡撫後所在公庾積儲餘粟凡有與作輒以取給豪民猾胥因為姦利琛至稽覈隱欺一裁之以法豪猾憚懼宿弊頓蠲仕至南京戶部右侍郎

倪謙撰墓誌

翁世資字資輔福建莆田人正統六年領鄉薦明年舉進士十年授戶部主事進郎中勘南畿水災奏蠲糧米七十餘萬發

粟賑貧全活甚眾陞工部侍郎天順四年歲祲蘇松歲造綺幣逋負甚多世資奏乞免忤旨貶衡州知府後遷江西左布

政使終工部尚書

康熙志

陳泰福建邵武人景泰五年以右僉都御史巡撫應天時富室田多輕額而重者多在貧下泰均之令五升之田倍其賦而官田之重者止取正額澤均而賦不損上下便之而富者不

怨

江南通志

鄒來學字時敏湖廣麻城人景泰六年以副都御史巡撫應天時吳中水旱頻仍來學請以今歲輸京米三十萬石已徵者悉貸予民來秋償官上從之既至首發倉賑饑勸農桑修水

利察官吏姦豪大家暴橫者悉繩以法又言蘇松等郡糧向
俱軍兌輸京項因邊警調軍征守令民自輸遂至役民十五
萬加以盤費之資須銀三十萬兩米四十萬石民所以重困
也今邊境頗寧請仍令軍運上可其奏著為令吳民至今德
之蕭鑑撰墓誌

李秉字執中曹縣人景泰中歷右僉都御史巡撫宣府天順初
罷巡撫官改督江南糧儲初江南蘇松賦額不均陳泰為巡
撫令民田五升者倍征官田重者無增耗賦均而額不虧秉
至一守其法尋舉知府違例被逮帝宥之復任請許墅關稅
悉徵米備荒會復設巡撫大臣薦秉才遂命巡撫大問明史

崔恭字克讓直隸廣宗人以右副都御史巡撫蘇松諸府按部
進耆老言利病為興革大治吳淞江起崑山夏界口至上海
白鶴江又自白鶴至嘉定下家渡迄莊家涇凡浚萬四千二
百餘丈又浚曹家港蒲漚塘新涇諸水民賴其利目曹家港
為都堂浦初周忱奏定耗羨則例李秉改定以賦之輕重遞
盈縮其例甚平而難於稽算吏不勝煩擾恭乃罷去悉如忱
舊明史

徐貫字原一浙江淳安人天順元年進士歷官工部左侍郎時
蘇松水患廷議推貫奉敕治之貫至簡有司分理踏勘授以
方略水患遂弭事竣陞本部尚書累加太子太保卒贈太保

諡康懿康熙志

劉孜字顯孜萬安人天順五年以右副都御史巡撫江南十府蘇松財賦自周忱立法後代者多紛更孜首訪忱遺蹟斟酌行之民稱便成化元年應天饑孜請盡發諸縣廩賑貸全活無算時民間多積困瀕江官田久廢沒仍責輸賦蘇松杭嘉諸府僉補富戶孜皆疏罷之召拜南京刑部尚書明史滕昭河南開封人成化六年以副都御史考察福建官誅濫勅來巡撫減秋糧加耗益漕運費甚得軍民心康熙志王恕字宗貫三原人巡撫南畿所部水災奏免秋糧六十餘萬石周行賑貸全活二百餘萬口江南歲稅白糧民多至破產

而光祿概以給庖人賤工又中官暴橫四方輸上供物監收者率要羨入織造繒綵及採花卉禽鳥者絡繹道路恕先後論列皆不納中官王敬挾妖人千戶王臣南行採藥物珍玩所至騷然長吏多被辱至蘇州召諸生寫妖書諸生大譁敬奏諸生抗命恕亟疏言當此凶歲宜遣使賑濟顧乃橫索玩好因盡列敬等罪狀敬亦誣奏恕會中官尙銘亦發敬姦狀乃下敬等獄戍其黨十九人而棄臣市明史劉魁字士元高唐人成化十七年以御史巡按不為崖岸而風裁自振時淫雨為沴山崩湖溢連郡田稼滅沒孳死萬數而當道一不以聞征斂如故魁排衆議力陳於朝言財賦資人

以成人者財之本也今欲取其末而先絕其本假令盡得其末以快目前後日之計已匱矣况無得乎又民窮為盜或至

狡竊於時誅討則所費亦不止若通稅而已也詔下郡縣覈

實會魁代去不果行民坐是瘵瘵久不能復追思甚深姑蘇志

侶鍾字大器鄆城人弘治三年以右副都御史巡撫蘇松諸府

盡心荒政召為戶部侍郎總督倉場明史

朱瑄鄆縣人弘治間以右副都御史巡撫應天開三江下流以

殺湖水濬孟瀆等河以通漕運築沙湖石隄以避其險請立

太倉州有六利上從之舊江南通志

李充嗣字內修內江人正德九年以右副都御史巡撫河南十

二年自河南移撫應天諸府寧王宸濠反充嗣將兵屯采石

傳檄部內聲言京邊兵旦夕至趣供餉以給賊賊果疑懼事

定以功進戶部右侍郎時有建議修蘇松水利者進充嗣工

部尚書兼領水利事未幾世宗嗣位遣工部郎林文濡顏如

瓌佐之開白茆港疏吳淞江六閱月而訖工詳見嘉靖元年水利

論平宸濠功加太子少保蘇松白糧輸內府正德時驟增內

使五千人糧亦加十三萬石帝用充嗣言減從故額又請常

賦外盡蠲歲辦之浮額者內府徵收監以科道官毋縱內臣

苛索帝俱從之改南京兵部尚書致仕明史

尤時熙字季美洛陽人嘉靖元年舉人以戶部主事權許墅關

稅一介不取有滸墅灘頭無濁水蘇州門外有青天之謠尋以母老乞歸以修德明道為己任學者皆稱西川先生

洛陽縣志

翁大立字道生餘姚人嘉靖十六年進士先以參政督餉蘇松三十八年擢右僉都御史巡撫應天諸郡會去內地冗兵并民間雜役常以荒政莫先水利請以工部官專司導濬時東

南倚為保障焉

康熙志

任環字應乾長治人嘉靖二十三年進士歷遷蘇州同知倭患起長吏不嫻兵革環性慷慨獨以身任之三十一年閏三月禦賊寶山洋小校張治戰死環奮前得賊相持數日賊遁去尋犯太倉環馳赴之嘗遇賊短兵接身被三創幾殆宰夫捍

環出死之賊亦引去

乾隆志曰舊志徐佩長洲人以庖人事環環將兵禦倭佩常從及敗於海上兵

死者蔽川環以一騎殿左右無人佩獨提刀捍禦已而復而臨渡馬少緩賊刃及環佩迎而當之遂死環得歸

至裏創出海擊之怒濤作操舟者失色環意氣彌厲竟敗賊

俘斬百餘復連戰陰沙寶山南沙皆捷擢按察僉事整飭蘇

松二府兵備踰年賊犯蘇州城閉鄉民繞城號環盡納之全

活數萬計副將解明道擊退賊論前後功進環右參政賊掠

常熟環率知縣王鈇破其巢焚舟二十七未幾賊掠陸涇壩

都督周于德敗績環偕總兵官俞大猷擊敗之焚舟三十餘

賊犯吳江環大猷擊敗之鶯脰湖賊奔嘉興頃之三板沙賊

奪民舟出海環大猷襲敗之馬蹟山其別部屯嘉定者火蕪

之盡死論功廕一子副千戶母憂奪哀賊平乞終制許之踰
 二年卒詔贈光祿卿再廕一子副千戶建祠蘇州春秋致祭
 環在行間與士卒同寢食所得賜予悉分給之軍事急終夜
 露宿或數日絕餐嘗書姓名於肢體曰戰死分也先人造體
 他日或收葬將士皆感激故所向有功明史

周如斗字允文餘姚人嘉靖甲寅以御史巡按蘇松諸府時倭
 患方亟歲又大祲如斗疏請蠲常稅十五調遣官兵禦倭有
 功滿歲以吳民乞留復任丙辰改督學南畿不徇請託士服
 其公壬戌進右僉都御史巡撫應天諸府時吳中大水與巡
 按御史陳瑞力請全免被災田糧凡已納於倉者皆還之民

尋移撫江西瑞字文峰閩人其請蠲災賦疏辭懇惻人多傳

誦乾隆志期滿當代士民詣闕請留一年召入厯官至兵部尙

書錢邦彥
祠碑記

曹邦輔字子忠定陶人嘉靖三十四年以右僉都御史巡撫應
 天倭聚柘林其黨自紹興竄轉掠杭嚴徽寧太平遂犯南京
 破溧水抵宜興為官軍所迫奔許墅副總兵俞大猷副使任
 環數邀擊之而柘林餘賊已進據陶宅邦輔督副使王崇古
 圍之僉事董邦政把總婁宇協勦賊走太湖追及之盡殲其
 眾副將何卿師潰邦輔援之以火器破賊舟前後俘斬六百
 餘人侍郎趙文華欲攘其功邦輔捷書先奏文華大恨會攻

陶宅賊復敗文華因言賊易滅督撫非人致敗乃逮繫邦輔
謫戍朔州隆慶元年起左副都御史邦輔廉峻自吳中被逮
時有司上所儲俸錢揮之去歷官四十年家無餘資明史

歐陽鐸字崇道泰和人嘉靖間以右副都御史巡撫應天十府
蘇松田不甚相懸下者畝五升上者至二十倍鐸令賦最重
者減耗米派輕齎最輕者徵本色增耗米陰輕重之賦乃均
諸推收田從圩不從戶詭得無所容州縣荒田四千四百餘
頃歲勒民償賦鐸以所清漏賦及他奇羨補之議徭役及裁
郵費凡數十百條民皆稱便明史

郭宗皋字君弼山東福山人嘉靖中巡按蘇松釐奸剔弊臨滿

止為朱玉峰建一坊題曰崇德為文衡山建一坊題曰表節

雖顧味齋在閣中亦不及也後遷順天巡撫

葛端肅家訓見池北偶談

海瑞字汝賢瓊山人隆慶三年夏以右僉都御史巡撫應天十

府屬吏憚其威墨者多自免去瑞銳意興革請濬吳淞白茆
通流入海民賴其利素疾大戶兼并力摧豪強撫窮弱貧民
田入於富室者率奪還之下令嚴發凌厲所司惴惴奉行豪
有力者至竄他郡以避姦民乘機告訐故家大姓時有被誣
負屈者由是怨頗興給事中戴鳳翔劾瑞沽名亂政遂改督
南京糧儲瑞撫吳甫半歲小民間當去號泣載道家繪像祀

之明史

宋儀望字望之永豐人嘉靖二十六年進士授吳縣知縣民輸
 白糧京師輒破家儀望合諸區各出公田計役授田贍之禁
 火葬創子游祠建書院惠績甚著徵授御史歷大理少卿萬
 曆二年張居正當國雅知儀望才擢右僉都御史巡撫應天
 諸府奏減屬郡災賦海警稍定將吏諱言兵儀望與副使王
 叔杲修戰備倭果至禦之黑水洋斬獲多進右副都御史先
 有詔雪建文諸臣儀望劾表忠祠祀之南京故太常卿袁洪
 愈祭酒姜寶皆不為居正所喜儀望薦之朝漸失居正意四
 年稍遷南京大理卿踰年改北被劾罷歸明史

周孔教字宗尼臨川人萬曆中巡撫江南時遣中使征權行旅

苦之戶部建議漕折徑輸邊鎮孔教言其害皆免二十六年
 大水條上荒政二十三事又請改折漕米百五十萬并留權
 稅及漁課諸色銀二十餘萬以賑疏入未報乃先發廩濟貸
 又括公帑羨金至荆襄市米方舟相濟米價頓平舊江南通志

周起元字仲先海澄人萬曆二十九年進士天啟三年擢右僉
 都御史巡撫蘇松十府公廉愛民絲粟無所取遇大水百方
 拯卹民忘其困織造中官李實素貪橫妄增定額恣誅求蘇
 州同知楊姜署府事實惡其不屈撫他事劾之起元至即為
 姜辨寃且上去蠹七事語多侵實實欲姜行屬吏禮再疏誣
 逮之起元再疏雪姜更切直魏忠賢庇實取嚴旨責起元令

速上姜貪劣狀起元益頌姜廉謹詆實誣毀因引罪乞罷忠賢大怒矯旨斥姜為民起元復劾實貪恣不法數事而為姜求寬實以此斂威而忠賢遂銜不置分守參政朱童蒙狂暴肆行起元列其貪虐狀以聞忠賢遂矯旨削起元籍擢童蒙京卿六年二月忠賢欲殺高攀龍周順昌繆昌期黃尊素李應昇周宗建六人取實空印疏令其黨誣起元為巡撫時乾沒帑金十餘萬日與攀龍輩往來講學因行居間矯旨逮起元至京酷加拷掠責贓十萬九月斃之獄中吳士民及其鄉人無不垂涕者崇禎初贈兵部右侍郎福王時追諡忠惠

明史

祁彪佳字宏吉浙江山陰人崇禎四年以御史出按蘇松諸府

杖殺積猾四人周延儒憾之尋以侍養歸福王時擢右僉都御史巡撫江南蘇州諸生檄討其鄉官從賊者奸民和之少詹事項煜及大理寺正錢位坤通政司參議宋學顯禮部員外郎湯有慶之家皆被焚劫常熟又焚給事中時敏家燬其三代四棺彪佳請議從逆諸臣罪而治焚掠之徒以加等從之尋移病去

明史

馮元颺字爾賡慈谿人崇禎時以禮部郎中遷蘇松兵備參議溫體仁當國唐世濟為都御史皆烏程人其鄉人盜太湖以兩家為奧主元颺捕得渠魁世濟族子也寘之法遷福建提學副使巡撫張國維奏留之太倉人陸文聲訐其鄉官張溥

張采倡復社亂天下巡按倪元珙以屬元颺元颺盛稱溥等元珙據以入告體仁庇文聲兩人並獲譴元颺謫山東鹽運

司判官歷右僉都御史巡撫天津

明史

張國維字玉笥東陽人崇禎七年擢右僉都御史巡撫應天安

慶等十府寬厚得士大夫心屬郡災傷輒為請命建蘇州九

里石塘及平望內外塘長洲至和等塘修松江捍海隄遷工

部右侍郎總理河道

明史

路振飛字見白曲周人崇禎中以御史巡按蘇松請除輸布收

銀白糧收兌之四大患民困以蘇會常熟瞿式耜等為奸民

張漢儒所訐溫體仁坐振飛失糾擬旨令陳狀振飛白其無

罪語刺體仁體仁恚激帝怒謫河南按察司檢校

乾隆志引明史道

光志刪此而引具區志未合今仍乾隆志振飛國變後流寓洞庭東山子孫家焉附記於此

黃希憲字又生宜春人天啟乙丑進士累陞太僕少卿崇禎十

三年繼張國維來撫吳為政一循其舊先是蘇民困於役最

重者為白糧解戶家無不破其次則徵收地丁銀謂之收頭

民田十畝以上者皆不免希憲請於朝以白糧委縣佐而收

銀屬之吏重困盡釋其法至今不變

康熙志

凌義渠字駿甫烏程人天啟乙丑進士崇禎時歷蘇松兵備性

廉約嚴肅務存大體時吳俗抗傲競為巧詐義渠靜泊無為

不事橫厲而單辭折辨吏民不敢欺勉諸士子砥礪文行勿

事虛名陞山東右布政士民思之康熙志舊注南通志合纂

國朝 ○秦世禎字瑞寰廣寧人順治八年以御史按吳巡撫土國寶以下江南功再涖吳貪縱執法其吏沈碧江故長洲猾胥也國寶嬖任之時江南初定盜賊常竊發碧江倚國寶勢索富民財不遂者輒誣以盜周內之遠近震恐守令爭造其門非重賄不見常熟知縣瞿四達嘉定知縣隨登雲剗拔富法凡獲盜令指富人為窩黨逮繫獄入財即釋以其財分餽碧江由是國寶以兩令為賢世禎下車首劾之國寶懼自經死斃碧江於杖按兩令寘之法墨吏望風改行諸冤濫久繫者悉

清出之自是民得安枕漕卒驕橫每米一石索加銀二三錢世禎奏立五米五銀法官為給之著為令嘗按行太倉方農時半月無雨人以為憂世禎一日雪數因兩大降民呼為御

史兩擢僉都御史巡撫浙江康熙志舊江南通志合纂

○周國佐字振宇遼陽人順治九年以兵部右侍郎兼右副都御史巡撫江蘇為政不尚刻礪吳中自喪亂後民間刁訟繁興冤累破家者多國佐閱情詞稍實者始准行一二嚴飭屬吏聽斷無留滯豪惡犯法者因事除之無少縱威惠並行海寇至檄所司嚴兵以待賊知有備遂遠遁舊院署燬於兵燹僦屋以居至是相度廢址營建復還舊觀康熙志舊志此下有李來泰傳今

○郎賽滿洲人順治中以都督駐蘇州時初設軍屯賽軍紀嚴

肅塵市晏然舊江南通志

○李森先字琳枝平度人進士順治十三年以御史巡按江南

自秦世禎後繼至者稍寬縱豪猾胥吏仍倚官虐民森先至

吳捕其尤者十一人寘之獄又舉孝子節婦數人與民期集

圓妙觀行賞罰約以幣酒旌節孝而斃十一人於杖先一夕

忽以他案株連被逮民咸憤怨聚虎邱望山橋號泣夾道送

至滄墅關關民亦聚眾數千哭聲震野緹騎為感動不敢侵

慢至都事雪復原官康熙志舊志此下有宮家壁傳今刪

○韓世琦字心康本蒲州人明大學士曠曾孫世琦隸旗籍為

遼人康熙元年由順天巡撫移撫江南懲前政之弊加意拊

循日進士民詢以利病次第舉行崇明諸邑濱海居民遷內

地者安輯不令失業所棄界外田三千八百餘頃為奏免額

賦萬九千餘石折銀萬六千餘兩蘆課八千餘兩 國初平

定江南吳中特置重兵以防寇盜北來軍士素驕橫為民患

至是世琦奏言江南寧謐力請調回及撤回之日慮其擾民

與統兵者約令嚴加禁戢躬率文武將吏往來巡視無一人

敢干令者三年夏瀕海太倉等州縣颶風大作飄沒民田廬

舍萬計親往勘實奏蠲其稅七年吳中大水餓殍載途世琦

繪圖入告始得蠲賑嘗疏請減免蘇松浮糧詳田賦類事雖不行民甚德之居八年以各屬逋賦被議去康熙志

○簡上字謙居四川巴縣人順治八年舉人康熙七年視學江南每發榜後進諸生而面誨之試蘇州題中有上字一生寫上為尙呼問故生曰憲名未敢正書耳上怒曰汝將以求媚耶士人行已貴乎立品即小可以見大即窮可以徵達推此意也他日微俸立朝則婢媵奴顏汝必安為之矣跪生於庭立令改正後陞參議去吳門補乘

○馬祐字篤周滿洲人順治九年進士第三人及第歷欽天監監正康熙九年超擢江南巡撫下車首撤供帳絕饋遺正已

率屬不事苛細江南舊多逋賦有司畏考成率那移報完前後相蒙由是坐罷者百人祐稔知其事分別吏侵民欠疏請銷追又密奏請蠲康熙元年至八年逋賦一百九十餘萬

詔從之民困大紓淮揚蘇松常鎮六郡頻罹水災勘實奏請咸得蠲賑濬劉河吳淞江以利蓄洩清田畝以豁賠累行官收官兌以甦役困修寶帶橋築南北塘以便兵旅安戢駐軍殲盜魁雪大獄嚴絕聚博禁婦女入寺燒香善政亟行一時風俗清謐十五年霪雨滄沒田廬憂惶成疾臨終自草遺疏極

陳水災民困言不及私康熙志

○慕天顏字鶴鳴靜寧人順治十二年進士康熙九年由福建

副使擢江蘇布政使江南自明季以來賦重民困積逋無算蘇郡尤甚有司那移掩飾吏緣為姦天顏建議解司地丁軍餉俱用司批稽其出入吏不能混時吳中水旱相仍議請蠲貸緩徵疏濬吳淞劉河寓賑於工丁內艱

特旨起復尋入覲凡七上疏曰減浮糧除荒坍治淮黃寬涸田調守令均田役給囚糧居七年就擢江蘇巡撫晉階太子少師兵部尚書以逋賦無徵再請酌蠲

詔從之復條上免坍荒停捐例更則例等八疏十八年旱蝗賑恤甚至開濬白茆孟河建牐蓄洩為東南之利二十一年坐

他事降調去

康熙志

○方國棟字干霄宛平人順治二年舉人康熙十二年遷分守蘇松常道參議律已甚嚴莫敢干以私事親至孝事必稟命長洲吳江濱河隄岸歲久傾圯國棟躬率吏民併力修築堅固又修沿海墩臺橋梁及吳淞劉河兩牐措辦工費不以擾民滿洲蒙古兵駐防蘇州國棟請度城南隙地立營屋宇器械糗芻之屬無不預備師旅如歸民得安堵善待文士賑荒育嬰多惠利奉檄採木入宜興山中以勞邁疾卒民哀慕之

康熙志

○湯斌字孔伯睢州人順治九年進士康熙二十三年由內閣學士擢江蘇巡撫陞辭

聖祖諭曰江南風俗奢靡訟獄繁夥以卿耐清苦特令往撫之
冀有所變革因賜鞍馬綵緞白金

御書恩意備至時

駕將南巡急抵任則文案山積方迎

駕渡江就舟中晝夜判決六日而積滯盡清扈 蹕至江寧再

賜

御書蟒裘令逕歸署蘇松舊患積逋相仍有司不滿歲卽望誤

去故皆牟利不自愛上官持其短索賂益急虧公帑項繫者
纍纍賦至進州縣吏盡斥其所爲令其改過自新皆頓首感
泣又誠司道郡守不得責屬吏餽金於是除耗羨禁私派清

漕弊汰蠹役行保甲革鹽商匣費一切皆以身先屏絕請託
居數月劾其貪暴尤甚者去之自總督將軍下皆傳相戒不
受所屬一錢奉使京官往來過客迅棹疾去亭傳無斗粟之
費吏治廓然大清其爲政以寬民力興教化培植根本爲務
患蘇松逋賦難清請改並徵爲帶徵免十八九兩年災欠減
賦額寬考成豁逃丁調驛困免蘆課買銅除邳州版荒蠲明
萬曆朝所加九釐餉遇災傷弊政立具疏聞淮揚徐水災先
後奏免額賦數十萬兩又發常平倉粟及借將軍提鎮樞關
輪粟往賑復檄布政司以庫銀五萬告繼江西湖廣皆先發
後奏所全活億萬計吳俗舊弊凡婦女出游里中賽會演劇

無籍子博戲鬪毆一切禁止嚴市肆淫辭邪說之流行刊布者禁有喪家火化及久停柩者吳地素多淫祀楞伽山五通神尤甚姦巫淫尼競相扇惑士女怵於禍福鼓吹牲帛賽禱無虛日斌取其像投湖中并他處所建悉毀之奏請通行永禁民始大駭已而妖遂絕立義倉復社學重修泰伯祠朔望往謁又謁范文正公及周忠介公祠以為眾勸數詣學宮命諸生講孝經童穉亦得環聽勤於課士文必親閱以拔其尤吳俗於是不變天性淡泊居官不以絲毫擾民每食惟脫粟豆羹民間至以諺語呼為豆腐湯云二十五年

詔擢禮部尚書掌詹事府事吳人聞其去痛哭罷市叩轅門乞

留者日萬計比行老幼提攜奔送自吳門至江北不絕至渡淮乃已初前撫余國柱在吳聲名狼籍既遷戶部尚書移書江蘇布政使索庫銀四十萬兩以媚要人斌不許又聞斌深得民心以為形已之短恨刺骨及斌赴召還朝國柱已居政府讒害百端又嗾廷臣交章劾之時斌已病尋改工部未幾卒吳人聞其歿無不號慟建祠郡學西肖像祀之雍正十二年奉

旨崇祀賢良祠乾隆元年追諡文正乾隆志道光三年奉

旨從祀

文廟道光志

蘇州府志

卷六十八

名宦

三

○宋學字牧仲商邱人康熙三十一年由江西巡撫移節江蘇凡民間利病諮訪甚勤每逢歉歲奏請蠲賑賓禮文彥獎激旨後進尤多造就撫吳十四載不為赫赫之譽而去後人皆思

之江南通志

○王繻睢州人康熙三十九年督理蘇松四府糧儲道前後居是官者徵糧時率納屬縣餽金繻一切屏絕倉吏有浮收加派者嚴治不少貸漕卒亦不致額外多索遂弊絕風清

乾隆志

○張伯行字孝先儀封人康熙二十四年進士累遷江蘇按察使擢福建巡撫四十九年移撫江蘇伯行素以理學清節著聞既至首戒屬員餽送禁吳俗奢侈及士女出遊時江南頗

歲災祲上疏請賑淮揚徐三郡被水州縣又請暫緩江蘇各屬帶徵漕米及借帑買米平糶皆得

旨允行是年大計盡除屬吏之貪殘不職者士民為之鼓舞而是時總督噶禮貪黷怙勢遍置私人每事與伯行齟齬辛卯科場事發

詔遣戶部尚書張鵬翮至揚州會同督撫審理伯行先聞噶禮暗主其事及會鞫時噶禮顯有徇庇鵬翮畏其勢不敢窮究伯行遂抗疏劾督臣營私壞法其末有曰仰祈

皇上下奮乾斷除兩江之民害快四海之人心振千古之綱常培一時之士氣疏出海內傳誦噶禮亦馳疏誣伯行不肯出

洋巡海及其他數事有

旨並解任聽勅復遣戶部尚書穆和倫工部尚書張廷樞來南
會審然皆畏噶禮坐伯行革職噶禮免議奏上

聖祖責諸臣顛倒是非特革噶禮職留伯行巡撫任且諭在廷
諸臣曰張伯行乃天下第一清官噶禮辦事歷練至於操守
朕不能信若非張伯行在彼江南地方必受其侵削一半矣
當是時中外無不仰頌

聖明知人之哲獨斷之威吳人聞伯行再來遮道相迎歡聲動
地伯行益矢恪勤奉

旨會察戰艦疏請分別營哨商漁舟編列號數使姦無所容奏

免揚州落地稅以除商民之累勅建紫陽書院選四方髦士
肄業其中親閱其文訓以程朱正學復置田以資膏火撫吳
前後五載始終不受一錢官吏莫敢冒法貪濫以布政使牟
欽元庇匿海盜族黨劾罷之張鵬翮前審科場事已與伯行
不合至是又奉

旨來審竟坐伯行重辟

聖祖知其無罪召入京仍授倉場總督後歷禮部尚書卒諡清
恪至今吳中推伯行清望與湯斌相亞以爲前湯後張云

志

○鄂爾泰滿洲鑲藍旗人雍正初授江蘇布政使設春風亭招

致文士試以古學得五十三人拔吳江顧我錡為冠

此句據吳門補

乘輯南邦黎獻集沈德潛時為秀才亦與其選
增二語據吳門補乘增又

補鑄郡廟祭器一時禮樂蔚然改觀遷雲南巡撫後以功封

襄勤伯拜武英殿大學士卒諡文端

節道光志

○尹繼善字元長滿洲鑲黃旗人雍正元年進士六年署江蘇

巡撫署河道總督七年再任江蘇巡撫劾奏前吳縣知縣蔡

益仁貪婪不法又奏先給官丁漕費使無不足然後一裁以

法先是有司收漕以腳費為名率一斗準作六七升繼善奏

明每石納免費錢五十二文而斗斛聽民自概有遺粒在斛

之鐵邊者亦謂之花邊令民自拂去常平社倉穀聽民樂輸

不得隨漕勸徵自是漕務肅清者四十餘年八年奏言福山

營為江防門戶應撥蘇鎮沙船四號隸之與京口狼山等汛

按期會哨又江蘇按察使駐江寧距巡撫治所遠請移駐蘇

州蘇松道責在巡防應移駐上海下部議行旋署兩江總督

凡三為兩江總督授文華殿大學士卒諡文端

道光志吳門補乘合纂

○馮景夏字樹臣桐鄉人康熙二十二年舉人雍正五年官蘇

松常鎮太糧道先是州縣徵糧以漕費為名溢額者無禁景

夏請每石加漕費六分

錢八折四十八文又加水次運費四文

半給旗丁半抵

州縣修倉供應諸費盡革斛面耗米以部頒收漕斛式較寬

議改小口斛裹以鐵米不得溢巡撫尹繼善先後以

聞著爲令民大便之在官每乘小舟冒風雪潛行訪治諸倉姦猾吏所部肅然九年遷安徽布政使累遷刑部侍郎卒於官

彭紹升
測海集

○徐士林字式儒文登人康熙五十二年進士雍正十年由安慶知府擢江蘇按察使士林正直忠厚精明強記先歷刑曹更大郡益明習法令周知情僞凡讞決先摘定案大略懸示於外而後發吏繕文冊由是吏無所容其奸守令進謁者必試以疑難案情觀其才識而教誡之秉臬一年大稱平允以前任失察事降補汀漳道乾隆元年陞河南布政使丁父憂歸服未闋時兩奉

特旨命署理江蘇布政使事皆以母病固辭四年四月赴京召見卽實授江蘇布政使單車至蘇隨村僕三人襤被一囊而已江蘇自

高宗登極以來豁免逋賦浮糧蠲租議賑不可勝紀官俸兵餉以及戰艦河防築城浚渠諸經費動踰數十百萬藩庫所儲漸虞不支士林悉心調劑罷緩不急之務一切出納皆躬自裁決是年

特旨所蠲正供百萬兩督臣奏明止派小戶以惠貧民而田數難稽議者紛紛不決士林令各州縣檢考徵冊按額銀多寡分爲三等派蠲民得均沾實惠地方旱蝗勤加諮詢先事預

籌時爲具奏又以近日民情漸驕望恩倖澤妄控官長爲治道慮時誠屬官整飭綱紀其條奏資送流民事尤爲盡善蘇藩案牘之繁爲天下最士林殫力清釐一燈熒然每至夜分泣蘇十月而案牘減十之五五年七月就擢江蘇巡撫士林益感

主知告誡屬員所頒條教曲盡居官之道吳中多奢靡游惰之習著爲條約力勸紳士爲民表率嘗於九秋暇日設五簋脫粟具招宴紳士於滄浪亭令郡民縱觀俾知節儉務本之道凡官民苦累知無不言賑恤淮北水災熟籌倉穀定楚中鹽價等疏皆據實陳奏不避嫌疑素工舉子業課士必拔眞才

不肯濫收愈常平積貯有限下教各州縣實力奉行社倉法事垂成而士林已積勞成疾矣六年三月具疏乞歸

優詔慰勉遣太醫診視令在任調攝士林以病體難支又念母老久未歸省瀝誠再奏方准給假而病勢已重行至淮安遂卒遺疏中猶勸

上以憂盛危明之心爲久安長治之計

上聞悼惜下

詔褒卹入京師賢良祠

乾隆志

○陳宏謀字汝咨廣西臨桂人雍正元年進士嘗爲江蘇按察使後由陝西巡撫調任江蘇頒訓俗良規

見風俗門擒治治平寺

姦僧

見雜記

步禱五龍堂

見祠廟門

其於漕政一秉前撫尹繼善所

定章程弗絲毫假借有某縣令加收一升五合被劾坐絞旋

遷兩廣總督又以總督銜仍管江蘇巡撫事奏言蘇州向設

普濟育嬰廣仁錫類等堂收養焚獨老病遺棄嬰孩近年公

費不敷請查通州崇明濱海淤灘除附近民業者聽升科執

業餘撥入堂公用又通州崇明交界有新漲之玉沁河兩處

民互爭亦撥入以息爭端

諭曰不但一舉而數善備而汝亦因此得名也又奏開蘇州府

屬之白茆河徐六涇建閘以備蓄洩復以水漲衝決閘口請

改爲滾壩俱從之以東閣大學士致仕卒年七十六諡文恭

道光志參
吳門補乘

○明德滿洲正紅旗人姓輝和乾隆三十年正月由陝西巡撫
調任江蘇未蒞任

命署江西巡撫十二月赴江蘇任江蘇糧不敷食常仰給於楚

蜀商民每閉糴居奇明德屢加勸諭各屬辦案疲玩成習督

催不使堆積佐雜不得擅受民詞私作威福蘇省襟帶江湖

大海界連兩省劫盜尤多飭屬查拏立破多案崇明漁船出

洋後輒肆強劫令於口岸增兵嚴察南匯山陽兩縣民有傷

父兄致死者承審官誤照過失殺問擬明德親提駁改奏革

原審各員職並劾按察使李永書不勝任請交部嚴議

諭曰向來督撫每於臬司審轉案件往往曲為徇隱若明德之秉公持正何患讞獄之不平允吏治之不整飭乎賞荷包六個以示優獎又奏常熟縣福山塘一河為蘇州等處入海要津支港甚多灌民田數萬頃乾隆二十六年濬後迄今又淤請借撥司庫內銀九千七百餘兩乘時再濬於所灌民田分兩年徵收歸款從之三十三年二月調補雲南巡撫三十五年卒於官

○長麟姓覺羅正藍旗人舉人由江蘇按察使遷布政使乾隆五十年吳中旱悉心賑濟全活甚眾五十五年署江蘇巡撫微行密訪訟師張克昇按律戍諸邊執無賴數十而斃其魁

於杖拘博徒六人枷以徇奸宄絕跡禁小錢設局收銷會奸民某甲從湖廣運沙錢至訊明來歷馳驛密捕私鑄為戢旋即真與糧儲道汪志伊籌辦清漕收漕蠹吳開周於獄罰築沙湖隄嚴絕漕弊斛面聽民自擬不得浮顆粒所部肅清漕政自尹繼善奏定章程後積久弊生至是力為整頓民困以蘇調山西終領隊大臣吳門補乘

○費淳字筠浦浙江錢塘人乾隆癸未進士江蘇巡撫嚴米船出洋之禁沿海布列卡房數十處緝拏私販嘉慶丁巳歲旱步禱長跪烈日中三日甘霖大沛蘇城河道淤塞穢濁之氣蒸為疾沴淳督守令勸諭士民一律疏通尋擢兩江總督後

由體仁閣大學士左遷兵部侍郎升工部尚書卒於官諡文

恪節道

○岳起字小瀛滿洲鑲白旗人乾隆辛卯舉人江蘇巡撫持身

清儉衣服起居不異寒士出入惟乘一馬吳中繁華之俗為

之一變官中一切陋規裁革淨盡官署內外應用之物下至

挑水掃地之役皆自出私財不以一毫累其屬遇公事出巡

所過州縣皆不知之節道

○林則徐字少穆福建侯官人嘉慶辛未進士以翰林歷官至

江蘇按察使道光癸未江蘇大水松江民聚眾告災洶洶將

變巡撫已調兵則徐扁舟往即解散是年通省災賑事皆則

徐主之頌聲大起辛卯自河東河道總督調江蘇巡撫是年

又大水壬辰癸巳相繼患澇河事孔棘沿河閘壩及通倉交

免費益重一船津貼至千金蘇漕一百六十萬石分載數百

艘徵米之外加費數百萬惟閭閻是求民既困災又困於浮

勒有棄田而逃者定例秋災不出九月癸巳秋杪淫雨不止

稻已刈盡爛則徐以續被災荒請緩征

嚴旨詰責督臣躊躇不敢決則徐單銜密疏瀝陳江蘇連年錢

漕之累小民之苦反覆數千言堅請緩征

上鑒其誠特俞所請是年江蘇徵則徐言官民全局幾殆疏畧

曰江蘇連年災歉民情竭蹶異常望歲之心人人急切今夏

雨暘時若滿望得一豐收稍補從前積歉乃自六月間江湖盛漲沿江各州縣業已被災其時蘇松各屬棉稻青蔥猶冀以江南之贏補江北之絀蓋本省漕賦在江北十之一在江南居十之九故蘇松等屬秋成關係尤重惟所種俱係晚稻成熟最遲秋分後稻始揚花偏值風雨陰寒遂多秀而不實然猶不失爲中稔迨九月後仍復晴少雨多晝則霧氣迷濛夜則霜威寒重雖已結成顆粒僅得半漿鄉農傳說暗荒區猶不信於立冬前後親坐小舟密往各處察看見一穗所結多屬空稈半漿之禾變成焦黑然猶盼望晴霽庶可收曬上

忌十月以來滂沱不止迅雷閃電晝夜數番自江寧至

江蘇見聞如一雖中間偶爾見晴而陽光熹微不敵連旬盛雨在田未割之稻難免被淹已割者欲曬無從亦發芽霉爛鄉民烘焙勉強試礱而米粒已酥上礱卽碎是以業戶至今未得收租又各屬沙地祇宜種棉男婦織紡爲生者十居五六連歲棉荒歇業生計維艱今年早花已被風搖而晚棉結鈴尙旺如得晴暄天氣猶可收之桑榆乃以雨霧風霜青苞腐脫計收成僅可一二分小民紡織無資停機坐食且節候已交冬至卽趕緊種麥猶恐過時況又雨雪紛乘至今未已田皆積水明歲無春花接濟民情更形窘迫此在臣奏報秋災以後歉象加增日甚一日之情形也曩時蘇松之繁富由

於百貨之流通挹彼注此尙堪補救近年以來不獨江蘇屢
歉卽鄰近各省偏災布匹絲綢銷售亦少權子母者無可謀
之利任筋力者遂無可趁之工故此次雖係勘不成災其實
與全災無異稿出遐邇傳誦焉又仿周文襄公酌劑公私田
加耗減耗之法百畝中有二三十畝近沮洳者皆請緩推之
千畝萬畝皆然統核其田畝之數約七八成餘則報歉米數
則就其上則者計之民間得此喘息爲之少蘇旋署兩江總
督後以雲貴總督致仕未幾粵西賊起

宣宗崩

文宗卽位卽家起爲

欽差大臣赴桂林辦賊時則徐年六十有七已病行至潮州憊
不起薨於行館遺疏

聞

天子震悼贈太子太傅諡文忠文忠官歷十四省生平三大事
江南則漕賑此外新疆屯田雲南回務以無與於吳故不詳
詳其專繫於吳者癸未吳市米價騰貴縣官循例條示民不
省文忠躬至楓鎮米市與市僧行賓主禮坐而商市不能徧
歷則各投一刺人心平故米價立平癸巳勘饑戶不委官委
各學諸生按圖領勘故饑戶無遺漏民沾實惠此在文忠爲
委曲瑣屑而吳人士目擊心欽至今不能忘故備書之

蘇州府志 卷六十一
○裕謙蒙古正紅旗人嘉慶丁丑進士由翰林歷官江蘇巡撫奏毀楞伽山淫祠飭采苦節婦女彙請旌典教民節儉創恤孤局收養棄孩捐資助寒士之不能赴省試者所謂賓興局自此始也旋擢兩江總督辛丑西人犯順充欽差大臣駐鎮海與提督余步雲不和謙率前隊進戰後失援應死之事

聞

賜祭葬崇祀昭忠祠諡靖節

○吉爾杭阿奇特拉氏滿洲鑲黃旗人咸豐三年由工部郎中以道員揀發江蘇署按察使會青浦周立春反陷青浦川沙

南匯嘉定不數日上海粵匪劉麗川又反幫辦軍務許乃釗自金陵大營統兵剿之吉爾杭阿從征克青浦南匯川沙嘉定擒立春進攻上海逾年乃釗罷吉爾杭阿先已擢布政使旋擢巡撫代乃釗督師五年正月朔克之誅劉麗川捷聞賞頭品頂戴法施善巴圖魯名號時江寧揚州鎮江皆爲賊據上命吉爾杭阿移師攻鎮江遂駐軍京峴山與

欽差大臣向榮合力攻勦戰輒有功六年春鎮江賊結瓜州賊竄入高資吉爾杭阿曰高資賊糧道也令江寧知府劉存厚扼之於煙墩山賊大恐五月率衆數萬來犯存厚被圍知縣松壽鹽知事張翊國戰死吉爾杭阿率親兵馳往救之抵煙

墩山中鎗卒事聞

給一等輕車都尉世職

敕殉難地方建專祠諡勇烈

昭忠錄


○徐有壬字君奇烏程人道光己丑進士由戶部主事累官至江蘇巡撫時布政使王有齡與總督何桂清善事權者屬焉有壬至務持大體不爭赫赫名咸豐十年二月徽盜賊入杭州陷其城蘇省震動比廣西提督張玉良克復杭城東壩又陷大營潰時總督何桂清率師駐常州棄城遁賊由丹陽宜興分道下四月十二日賊薄蘇城十三日城陷有壬死之事聞

卹贈如例諡壯愍

○劉卹膏河南太康縣人由道光丁未進士歷知江蘇嘉定青浦上海等縣有劉青天之目同治元年以海防同知奉

特旨擢署按察使其時江蘇全省陷於賊僅留上海一隅權立行省三面賊巢巡撫李公援軍初至賊目李秀成譚紹洸統數十萬眾迭次撲犯屢瀕於危卹膏以按察使總理營務汰舊募新措餉全賴籌畫旋擢江蘇布政使護巡撫篆減賦之案其經畫尤多未幾丁憂回籍卒

事實冊



蘇州府志卷第六十九

名宦二

漢

任延

鍾離意

鄭弘

王充

張霸

許荆

戴就

彭修

第五倫

謝夷吾

慶鴻

趙牧

張業

孫堅

朱治

芮祉

三國吳

滕胤

賀邵

謝承

吳展

晉

傅咸

鄧攸

張茂

顧祕

庾冰

蔡謨

虞潭

王洽

譙敬王恬

王恂

袁山松

王薈

何叔度

宋

江夷

劉損

羊元保

顧愷之

王僧虔

王延之

齊

張岱

安陸昭王緬

蕭順之

王思遠

梁

蘇州府志 卷六十九

李元履

何敬容

謝舉

江革

陳

沈君理

隋

皇甫績

唐

孔禎

張充

王規

王沖

劉權

袁誼

趙居貞

李刺史

韋元甫

李栖筠

裴胄

柏良器

李復

韓泥

韋應物

于頔

韋夏卿

李素

王仲舒

范傳正

張正甫

元錫

崔陵

白居易

狄兼謨

劉禹錫

蘇州府志

卷六十九

名宦二目錄二

三

蘇州府志 卷之二十九

陸亘

楊發

成及

五代

錢元璪

宋

閻象

薛朋龜

陳省華

孫冕

盧商

皮日休

曹圭

錢文奉

許袞

宋璫

裴莊

徐奭

王質

范仲淹

蔣堂

張去惑

富巖

張伯玉

杜曾

司馬光

蔣續

李仲偃

沈兼

李禹卿

滕宗諒

梅摯

蔡抗

鞠真卿

李清臣

邊珣

章帖

李夔

蘇州府志

卷之二十九

名宦二目錄

四

王觀

陳幾道

莊徽

江衮

湯東野

姜浩

章誼

向子諲

蘇師德

蔣璨

夏日長

唐充之

賈公望

吳彥璋

胡松年

李光弼

仇愈

周葵

孟忠厚

任盡言

朱翌

張孝祥

姚穎

高溶

沈度

汪應辰

邱宥

韓彥古

王佐

趙彥操

洪遵

沈介

劉洵直

沈虛中

姚憲

趙善擇

陳晞

莫漳

謝師稷

方導

燕州府志 卷之十九

沈作賓

趙希懌

趙彥楠

趙汝述

吳淵古

王遂

吳潛

趙與篋

陳塏

鄭士鉉

謝堂

徐鹿卿

吳樵

趙與嘗

王應麟

包振直


趙順孫

常懋

文天祥

張世傑

許應元




府志

卷之十九

名宦二目錄

六



蘇州府志卷第六十九

名宦二 歷代郡守
僚佐附

漢

任延字長孫南陽宛人更始元年拜會稽都尉時年十九迎官
驚其壯及到靜泊無爲唯先遣饋禮祀延陵季子時天下新
定道路未通避亂江南者皆未還中土會稽頗稱多士延到
皆聘請高行如董子儀嚴子陵等敬待以師友之禮掾吏貧
者輒分俸賑給之省諸卒令耕公田以周窮急每時行縣輒
使慰勉孝子就餐飯之吳有龍邱萇者隱居太末志不降辱
王莽時四輔三公連辟不到延遣功曹奉謁修書記致醫藥

候吏相望於道積一歲萇乃詣府門願得先死備錄延辭讓再三遂署議曹祭酒萇卒延自臨殯不朝三日是以郡中

賢士大夫爭往宦焉建武初徵為九真太守後漢書

彭修字子陽會稽毗陵人仕郡為功曹時西部都尉宰量行太

守事以微過收吳縣獄吏將殺之主簿鍾離意爭諫甚切量

怒使收縛意欲案之掾史莫敢諫修排閤直入拜於庭曰明

府發雷霆於主簿請聞其過量曰受教三日初不奉行廢命

不忠豈非過耶修曰昔任座面折文侯朱雲攀毀闥檻自非

賢君焉得忠臣今慶明府為賢君主簿為忠臣量遂原意罰

賞獄吏罪後州辟從事時賊張子林等數百人作亂郡言州

請修守吳令修與太守俱出討賊賊望見車馬競交射之飛

矢雨集修障扞太守為流矢所中死太守得全賊素聞其恩

信即殺弩中修者餘悉降散言曰自為彭君故降不為太守

服也後漢書 儀等萬人 據吳太守 秋君聞循勇謀以守命循與儀相

見陳說利害應時俱散民歌之曰時歲倉卒 賊縱橫大戟長弩不可當賴得賢令彭子陽

鍾離意字子阿山陰人少為郡督郵時部縣亭長有受人酒禮

者府下記案考之意封還記入言於太守曰政化之本由近

及遠今宜先清府內且濶略遠縣細微之愆太守甚賢之任

以縣事建武十四年會稽大疫死者萬數意獨身自隱親經

給醫藥所部多蒙全濟後漢書 舊志此下有包咸傳以事 與蘇郡不涉故刪以後凡言刪者視

此

第五倫字伯魚京兆長陵人少有義行建武二十九年拜會稽太守雖為二千石躬自斬芻養馬妻執炊爨受俸裁留一月糧餘皆賤買與民之貧羸者會稽俗多淫祀好卜筮民常以牛祭神財產以之困匱其自食牛肉而不以薦祠者病且死先為牛鳴前後郡將莫敢禁倫到官移書屬縣曉告百姓其巫祝有依託鬼神詐怖愚民皆案論之有妄屠牛者吏輒行罰民初頗恐懼或祝詛妄言倫案之愈急後遂斷絕百姓以安永平五年坐法徵老小攀車號泣相隨日裁行數里不得前倫乃偽止亭舍陰乘船去及詣廷尉吏民上書守闕者千

餘人詔公車諸為會稽太守上書者勿復受會帝幸廷尉錄囚徒得免歸田里後官至司徒

後漢書

鄭弘字巨君山陰人少為鄉嗇夫太守第五倫行春見而奇之

召署督郵舉孝廉元和中為太尉

後漢書

謝夷吾字堯卿山陰人少為郡吏學風角占候太守第五倫擢為督郵轉署主簿倫甚崇其道德使子從受春秋夷吾待之如師弟子之禮時或遊戲不肯讀書便白倫行罰遂成其業

後漢書本傳 參謝承書

王充字仲任上虞人仕郡為功曹以數諫爭不合去閉門潛思著論衡八十五篇刺史董勤辟為從事轉治中自免還家

後漢

書 舊志仕郡上有明帝時三字本傳無之

慶鴻洛陽人慷慨有義節與廉范為刎頸交位至琅邪會稽二

郡太守所在有異迹後漢書廉范傳

張霸字伯饒成都人永元中為會稽太守表用郡人處士顧奉

公孫松等奉後為潁川太守松為司隸校尉並有名稱其餘

有業行者皆見擢用郡人爭厲志節習經者以千數道路但

聞誦聲霸始到越賊未解郡界不宵迺移書開購明用信賞

賊遂束手歸附不煩士卒之力童謠曰棄我戟捐我矛盜賊

盡吏皆休祗事三年遂上病後漢書舊志此下有馬稜傳今刪

趙牧字仲師長安人少知名以公正稱歷侍御史會稽太守皆

有稱績盧志

許荆字少張陽羨人少為郡吏兄子世嘗報仇殺人怨者操兵

攻之荆聞乃出門逆怨者跪而言曰世前無狀相犯咎皆在

荆不能訓導兄既早歿一子為嗣如今死者傷其滅絕願殺

身代之怨家扶荆起曰許掾郡中稱賢吾何敢相侵因遂委

去荆名譽益著太守黃兢舉孝廉和帝時遷桂陽太守後漢書

張業吳郡由拳人為郡門下掾送太守妻子還鄉里至河內亭

盜夜劫之業與賊戰死後漢書張武傳

戴就字景成會稽上虞人按是時為安帝延光間未分吳郡至後太守劉寵舉就孝廉則吳會分矣

仕郡倉曹掾揚州刺史歐陽參奏太守成公浮臧罪遣部從

事薛安案倉庫簿領收就於錢塘縣獄幽囚考掠五毒參至
 就慷慨直辭色不變容安呼就謂曰太守罪穢狼籍受命考
 實君何故以骨肉拒扞耶就據地答言太守剖符大臣當以
 死報國卿雖銜命固宜申斷冤毒奈何誣枉忠良強相掠理
 令臣謗其君子證其父就考死之日當白之於天與羣鬼殺
 汝於亭中如蒙生全當手刃相裂安深奇其壯節即解械更
 與美談表其言辭解釋郡事徵浮還京師太守劉寵舉就孝
 廉光祿主事後漢書 獨行傳

孫堅臺吳郡富春人府召署假尉會稽妖賊起堅以郡吳郡
 司馬口精勇得千餘人與州郡合討破之是歲熹平元年

也三國 吳志

朱治字君理故鄣人隨孫堅征伐堅薨遷吳郡都尉從錢塘欲
 進到吳吳郡太守許貢拒之於由拳治與戰大破之遂入郡
 領太守事黃武元年封毘陵侯領郡如故二年徙封故鄣歲
 餘還吳三年卒在郡三十一年吳志 舊志朱治之前 有盛憲許貢傳今刪

芮祉字宣嗣丹陽人從孫堅征伐有功堅薦為九江太守轉吳
 郡所在有聲吳書見潘 濬傳注

三國吳

滕胤字承嗣北海劇人孫權時起家為丹陽太守徙吳郡每聽
 訟斷罪察言觀色務盡情理人有冤苦對之流涕吳志 傳注

賀邵字興伯山陰人爲吳郡太守初不出門吳中諸強族輕之
 乃題府門云會稽雞不能啼邵聞故出行至門反顧索筆足
 之曰不可啼殺吳兒於是至諸屯邸檢校諸顧陸役使官兵
 及藏逋亡悉以事言上罪者甚眾陸抗時爲江陵都督故下
 請孫皓然後得釋世說新語吳郡志以題府門爲賀循事

謝承字偉平會稽山陰人爲吳郡督郵歲穰有嘉禾一穗生於
 部屬拜五官郎中盧志

吳展字士季下邳人仕吳爲廣州刺史吳郡太守吳平還下邳
 閉門自守不交賓客蔡洪與刺史周浚書展忠足矯非清足厲俗信可結神才堪幹世誠聖王之老成明時之俊也
也 見世說注

晉

傅咸字長虞北地人咸甯中累遷尙書右丞吳國內史吳郡顧

榮與親故書曰傅長虞勁直忠果雖非周才亦足貴也晉書

鄧攸字伯道襄陵人元帝以爲太子中庶子時吳郡闕守人多

欲之帝以授攸攸載米之郡俸祿無所受惟飲吳水而已時

郡中大饑攸表賑貸未報輒開倉救之臺遣散騎常侍桓彝

虞駿慰勞饑人觀聽善否乃劾攸以擅出穀有詔原之攸在

郡刑政清明百姓歡悅爲中興良守後稱疾去職郡常有送

迎錢數百萬攸去郡不受一錢百姓數千人留牽攸船不得

進乃小停夜中發去吳人歌云統如打五鼓雞鳴天欲曙鄧

侯挽不來謝令推不去百姓詣臺乞留一歲不聽晉書

張茂字偉康會稽人少單貧有志行為鄉里所敬信元帝辟茂

為掾屬遷太子右衛率出補吳國內史沈充反茂與二子並

遇害贈太僕晉書

顧祕吳國內史唱義傳檄以討李辰石冰之亂吳郡志

庾冰字季堅亮之弟以雅素垂風自司徒右長史出補吳國內

史會蘇峻作逆遣兵攻冰冰不能禦便棄郡奔會稽會稽內

史王舒以冰行奮武將軍距峻別率張健於吳中時健黨甚

眾諸將莫敢先進冰率眾擊健走之於是乘勝西進赴京都

又遣司馬滕含攻賊石頭城拔之冰勳為多封新吳縣侯固

辭不受

晉書參吳郡志 舊志庾冰之前有應詹傳今刪

蔡謨字道明考城人歷遷侍中蘇峻構逆庾冰出奔乃以謨為

吳國內史既至與張闔顧眾顧颺等共起義兵迎冰還郡峻

平復為侍中

晉書

虞潭字思與餘姚人清貞有檢操為吳興太守蘇峻反加都督

三吳晉陵宣城義興五郡軍事峻平轉鎮軍將軍吳國內史

時軍荒之後百姓饑饉死亡塗地潭表出倉米賑救又修滬

瀆壘以防海鈔百姓賴之乎嘯父隆安初為吳國內史兄駿

之子谷亦位吳國內史

晉書 案乾隆道光志無子嘯父云云而盧志姑蘇志康熙志子並作孫

隆安初姑蘇康熙二志並作太元中姑蘇志并別為嘯父傳未知何本今從晉書及吳郡志

王洽字敬和丞相導第三子於諸子中最知名歷建武將軍吳

國內史徵拜領軍晉書

譙敬王恬字元愉忠正有幹局孝武時領左衛將軍補吳國內

史又領太子詹事晉書

王恂字元琳洽之子孝武時轉輔國將軍吳國內史在郡為士

庶所悅徵為尚書右僕射晉書

袁山松陽夏人博學有文章著後漢書百篇為吳郡太守孫恩

作亂山松守滬瀆城城陷被害晉書

王薈字敬文導第六子歷建威將軍吳國內史年饑粟貴人多

餓死薈以私米作餽粥以飼餓者所活甚眾徙尚書領中護

軍復為吳國內史轉會稽內史晉書 舊志此下有魏詠之傳今刪

何叔度廬江灑人義熙五年為尚書後為金紫光祿大夫吳郡

太守王弘稱其清身潔已宋書何尚之傳 案義熙乃晉安帝年號叔度尚之父也舊志列入

宋 誤

宋

江夷字茂遠考城人宋初拜吏部尚書為吳郡太守營陽王於

吳縣見害夷臨哭盡禮以兄疾去官後為右僕射歷任以和

簡著稱宋書 舊志此下有王韶之傳今據宋書本傳考定為吳興太守故刪

劉損字子騫蕭人衛將軍毅從父弟也元嘉中為吳郡守至閭

門便入太伯廟時廟室頽毀垣墻不修損愴然曰清塵尚可

彷彿衡宇一何摧頽即令修葺南史

羊元保太山南城人歷丹陽尹會稽太守太常吳郡太守文帝

以元保廉素寡欲故頻授名郡為政雖無殊績而去後常見

思不營財利產業儉薄南史

顧覬之吳郡人為吳郡太守其子綽私財甚豐鄉里士庶多負

其責覬之每禁之不能止及為郡誘綽曰我嘗不許汝出責

定思貧薄亦不可居民間與汝交關有幾許不盡及我在那

為汝督之將來豈可得凡諸券書皆何在綽大喜悉出諸文

券一大廚與覬之覬之悉焚燒宣語遠近負三郎責皆不須

還凡券書悉燒之矣綽懊歎彌日宋書

王僧虔琅邪臨沂人泰始初以白衣兼侍中出監吳郡太守七

年轉湘州刺史所在以寬惠稱南齊書本傳參宋書明帝記

王延之字希季臨沂人少靜默不交人事宋明帝時為吳郡太

守罷歸家產無所增益南齊書

齊

張岱吳人建元元年出為吳郡太守高帝知岱歷任清直至郡

未幾手敕曰大郡任重乃未欲回換但總戎務殷宜須望實

今用卿為護軍加給事中岱拜竟詔以家為府武帝即位復

為吳興太守南史

安陸昭王緬字景業建元元年出為吳郡太守政有能名竟陵

王子良與之書曰竊承下風數十年來姑蘇未有此政武帝嘉其能累遷甯蠻校尉雍州刺史南史

蕭順之字文緯梁武帝父建元中歷黃門郎安西長史吳郡太守所在著名吳郡張緒常稱文武兼資有德有行吾敬蕭順

之南史

王思遠臨沂人永明中邵陵王子貞為吳郡除思遠吳郡丞以本官行郡事論者以為得人南齊書

梁

李元履蘭陵承人幼有操業甚嫻政體仕梁為吳郡太守南史

張充吳郡人梁尚書僕射天監十一年除雲麾將軍吳郡太守

下車卹貧老故舊莫不忻悅以疾自陳徵為散騎常侍未及

還朝十三年卒於吳梁書

何敬容字國禮濟人普通四年出為招遠將軍吳郡太守為政

勤卹民隱辯訟如神視事四年治為天下第一吏民詣闕請

樹碑詔許之大通二年徵為吏部尚書梁書

王規字威明臨沂人中大通二年為吳郡太守主書芮珍宗家

在吳前守宰皆傾意附之至是珍宗假還規遇之甚薄珍宗

還都密奏規不理郡事俄徵為左民尚書吏民千餘人詣闕

請留表三奏不許求於郡樹碑許之南史

謝舉字言揚陽夏人大同三年出為吳郡太守先是何敬容居

郡有美績世稱何吳郡及舉為政聲跡略相比曾要何徵君講中論何難以巾褐入南門乃從東園進致詩往復為虎邱

山賦題於寺入為侍中太子詹事

南史

王冲字長深臨沂人梁大同三年以太子中庶子侍中出監吳郡滿歲即真徵為通直散騎常侍冲性和順事上謹肅習於法令政在平理佐藩蒞人鮮有失德雖無赫赫之譽久而見

思

陳書

江革字休映考城人高祖時除都官尚書尋監吳郡時境內荒儉劫盜公行革至郡唯有公給仗身二十人百姓皆懼不能靜寇革復省游軍尉百姓逾恐革乃廣施恩撫明行制令盜

賊靜息民吏安之武陵王出鎮江州表革同行除南中郎長

史潯陽太守

梁書 舊志此下有何遠傳今刪

陳

沈君理字仲倫吳興人高祖受禪為吳郡太守時兵革未甯百

姓荒弊軍國之用咸資東境君理招集士卒修治器械民下

悅附深以幹理見稱世祖嗣位徵為侍中

陳書 舊志此下有晉安王伯恭傳

隋

隋

皇甫績字功明安定朝那人隋平陳拜蘇州刺史高智慧作亂江南州民顧子元發兵應之因以攻績相持八旬子元素感

績恩於冬至日遣人奉牛酒績遺子元書曰曩者偽陳獨阻
聲教江東士民困於荼毒朝廷薄伐應時瓦解吳會臣民白
骨還肉惟當懷音感德行歌擊壤豈宜自同吠主翻成反噬
卿非吾民何須酒醴吾是隋將何容外交易子析骸未能相
告况足食足兵高城深塹坐待強援綽有餘力何勞踵輕幣
之俗作虛偽之辭以此見期必不可得卿宜善思活路曉諭
黎元能早改迷失道非遠子元得書於城下頓首陳謝楊素
援兵至合擊破之隋書

劉權字世略豐人開皇十二年拜蘇州刺史於時江南初平物
情尙擾權撫以恩信甚得民和煬帝嗣位拜衛尉卿隋書

唐

孔禎高宗朝為州長史時刺史曹王明不循法度禎每進諫明
曰寡人天子之弟豈失於王哉禎曰恩義不可恃大王不奉
行國命恐今之榮位非大王所保獨不見淮南之事乎明不
悅明左右有侵暴下人禎捕而杖殺之明後果坐法遷黔中
謂人曰吾愧不用孔長史之言以及於此累遷絳州刺史盧志
袁誼長安人神功中為蘇州刺史司馬張沛嘗白誼曰州得一
長史隴西李直天下甲門也誼曰夫門戶者歷世名節為天

下所高老夫是也山東人尙婚媾求祿利耳至見危授命則
無人焉何足尙耶沛大慚唐書舊志此下有武平一
張廷珪傳今刪

趙居貞鼓城人天寶九年二月自揚州長史遷吳郡太守立春
申君廟碑奏割崑山嘉興海鹽地置華亭縣又於海鹽置海

甯鎮

姑蘇志

李刺史

名闕

襄武人蘇州刺史兼御史中丞獨孤及稱其爲郡日

值海寇之亂事平徵還道卒贈吏部侍郎及又代房瑄撰祭

文稱其孝友慈惠公廉貞直姑蘇之役姦鋒構難公秉義勇

誅其渠魁海寇圍逼句吳震駭公率羸師克翦大敵奇謀生

於死地貞節見於孤城

姑蘇志

韋元甫少修謹敏於學行初任白馬尉以吏術知名所蒞有聲
累遷蘇州刺史浙西都團練觀察等使大厯初宰臣杜鴻漸

首薦之徵爲尙書右丞

舊唐書

李栖筠字貞一趙人代宗時爲常州刺史蘇州豪士方清因歲

凶誘流莠爲盜移數萬依黔歙間阻山自防東南厭苦李光

弼分兵討平之會平盧行軍司馬許杲恃功擅留上元有窺

江吳意朝廷以創殘重起兵卽拜栖筠蘇州刺史兼御史中

丞

唐書本傳無蘇州至中丞九字盧志有之不知何據

浙西都團練觀察使圖之栖筠

至張設武備遣辯士厚齎金幣抵杲軍賞勞使士歆愛奪其

謀杲懼悉眾渡江掠楚泗而潰以功進兼御史大夫則又增

學廬表宿儒河南褚冲吳何員等超拜學官爲之師身執經

問義遠邇趨慕至徒數百人又奏部中豪姓多徙貫京兆河

南規脫徭科請量產出賦以杜姦謀詔可元載當國久益恣橫代宗陰引剛鯁大臣自助欲收綱權以黜載拜栖筠為御

史大夫

唐書

裴胄字允叔河南人簡儉恒一累官監察御史不得意左遷桐廬尉時浙西觀察使李栖筠有重望虛心下士幕府盛選才彥觀察判官許鳴謙有學識栖筠常異席事多諮之崔造輩皆所薦引一見胄深重之薦於栖筠奏授大理評事觀察支

使

盧志

栢良器字公亮魏州人年十七在太尉李光弼幕中大厯初以左金吾衛將軍加檢校光祿大夫兼蘇州別駕加試殿中監

監察御史刺史李栖筠問其年對曰二十有四戰陣幾何曰

六十有二因涕泣言遭時喪亂父死家破誓棄性命以除寇

仇粗志未立豈敢求明公之知耶建中初至京師宰相楊炎

召與之語因言刺史李道昌無善政遂以韓滉代焉良器位

至將相圖形凌烟閣

盧志 舊志此下有林披李涵傳今刪

李復字初陽宗正卿齊物之子精曉吏道累遷江陵少尹歷饒

州蘇州刺史皆著政聲

舊唐書 舊志此下有孫成傳今刪

韓滉字太沖長安人有美名其所交結皆時之俊彥代宗朝自

太常卿出為晉州刺史居數月移蘇州領浙江東西都團練

觀察使安輯百姓均其租稅未及踰年境內稱理

盧志

韋應物洛陽人貞元初自左司郎中為蘇州刺史人賴以安能

賓儒士顧況劉長卿邱丹秦系皎然之儔類見旌引與之酬

唱以清德為唐人所重天下號曰韋蘇州葛繁韋蘇州集後序吳郡圖經續記

合纂 乾隆志曰唐史不載韋蘇州行事李肇國史補云性高潔鮮食寡欲所居焚香掃地而坐其為詩馳驟建安以還

各得風韻

于頔字允元後周太師謹七世孫為湖州刺史改蘇州罷淫祀

濬溝澮端路衢為政有績然暴橫少恩杖前部尉以逞憾觀

察使王緯以聞德宗不省唐書 舊志此下有李事舉傳今刪

韋夏卿字雲客萬年人累遷給事中屬東南歲歉出為常州刺

史以最績轉蘇州始至謀以息民布令曰矜老疾活艱困凡

在庶物令趣其本於是鄉計之而白於縣縣上之郡夏卿乃

條其年稅差並與蠲放遂加秩賜金借畱累歲擢吏部侍郎

夏卿性通簡好古為政務通理不甚作條教所辟士皆至宰

相大官世稱知人盧志 舊志此下有崔衍傳今刪

李素隴西人元和初以度支郎中刺衢州至一月遷蘇州李錡

前反權將之戍諸州者刺史至斂手無敢與敵素至十二日

錡反素將左右與賊戰州門不勝賊呼入素端立責以義皆

斂兵立不逼錡命械致軍將斬以徇及境錡適敗縛素脫械

還走州賊急卒不暇走死民抱扶迎盡出天子使貴人持紫

衣金魚以賜居三年州稱治拜河南少尹韓愈河南少尹李公墓誌

王仲舒字宏中祁人元和中為婺州刺史加金紫徙蘇州隄松江為路變屋瓦絕火災賦調常與民為期不擾自辦穆宗立

召為中書舍人唐書

范傳正字西老鄧州順陽人歷歙湖蘇三州刺史有殊政進拜

宣歙觀察使唐書

張正甫字踐方南陽人元和中歷鄧蘇二州刺史湖南觀察使

正甫仁而端亮涖官清廉居外任所至稱理唐書

元錫字君貺河南人什翼犍十四世孫歷衛婺蘇三州刺史所

至咸有聲績唐書

崔俊字德長大理卿沔之弟由膳部郎中充荆襄十道兩稅使

遷蘇州刺史理行為第一轉潭州刺史湖南觀察使俊居官

清嚴所至必理然性介急待僚屬不以禮節恃己之廉見賊

汗者如讐焉舊唐書

白居易字樂天天下邽人敬宗時以太子左庶子分司東郡拜蘇

州刺史居官勤瘁非旬休不設宴創築虎邱隄免於病涉亦

可以障流潦未幾病免劉禹錫贈詩云姑蘇十萬戶皆作嬰

兒啼蓋紀實也唐書吳郡圖經續記合纂

狄兼謨字汝諧太原人梁公仁傑族孫剛直有祖風歷斬鄧鄭

三州刺史改蘇州以治最擢給事中唐書

劉禹錫字夢得系出中山文宗時以禮部郎中集賢直學士出

為蘇州刺史以政最賜金紫服徙汝同二州遷太子賓客

陸巨字景山吳人太和中歷蘇州刺史以善政稱

唐書

盧商字為臣范陽人累遷大理卿開成初出為蘇州刺史初郡

人苦鹽法太煩姦吏侵漁商至籍見戶量所要自售無定額

人便之歲課增倍宰相以其績上遷浙西觀察使

舊唐書

楊發字至之馮翊人宣宗時為蘇州刺史治以恭長慈幼為先

徙福建觀察使

唐書舊志此下有盧簡求傳今刪

皮日休字襲美襄陽人咸通八年進士十年崔璞守蘇日休為

軍事判官與進士陸龜蒙唱和所賦詩名曰松陵集

盧志舊志此

下有王搏傳今刪

成及字宏濟錢唐人吳越錢氏時為蘇州刺史乾寧中楊行密

攻之常熟鎮將陸郢等以城應賊及被執行密閱其府庫惟

圖書藥物心敬重之與歸淮南將以為行軍司馬及辭曰及

百口託錢塘蘇城陷不能引決以至於此豈可以本道符節

易富貴於鄰境願以此身贖百口之命引佩刀自刺行密遽

起持之厚為禮而歸之鏐迎勞郊外把袂而泣終彰義等軍

節度使

吳郡志

曹圭臨平人少有膽氣事錢鏐梁開平中任蘇州制置使淮人

圍之急正月望夜圭張宴族人師魯宅盛陳燒燈令賊俘縱

觀淮人誓焉卒於官

吳郡志

五代

錢元璪字德輝吳越王鏐第四子儀狀瑰傑風神俊邁乾化二年以功遷蘇州刺史累授中吳建武軍節度使蘇常潤三州團練使加檢校太師同平章事中書令彭城郡王治蘇三十年儉約鎮靜郡政循理九國志吳越備史

錢文奉字廉卿元璪第二子善騎射能馬上運槊涉獵經史音律圖緯醫藥鞠弈之藝皆冠絕一時以蔭為蘇州都指揮使遷節度副使元璪卒代知蘇州中吳軍節度使有鑒裁禮下賢能士負才藝者多依之作南園東莊為吳中之勝多聚法書名畫寶玩雅器號稱好事又與賓僚共采史籍著資談三

十卷行於世

九國志吳越備史

宋

閻象鉅野人太平興國間吳越新附以禁兵千人屬象安撫遂知蘇州以齊魯之人悉能知越風俗而揉以善政恩涵澤濡民以蘇息政成召還改濟晉黃棣青等州卒歐陽修金部郎中閻公神道碑

許袞字公儀燕人雍熙中為均州防禦判官郡將表其能狀拜太子右贊善大夫通判蘇州時二浙之地始歸朝廷宿政如芬絲袞善理之就進殿中丞廬志

薛朋黽為蘇州錄事參軍廉勤明察胥吏呼為牛皮縑鼓言

難縑也

清異錄

宋璫字寶臣渭南人淳化中三吳歲饑疾病民多死擇長吏養

治之命璫知蘇州璫體豐碩素病足至州地卑濕疾益甚或

勸其謝疾北歸璫曰天子以民病俾我綏撫我以身病而辭

焉非臣子之義也既而太白犯南斗曰斗為吳分民方饑天

象如此長吏得無咎乎四年卒上聞之嗟悼錄其子明遠為

蒲城主簿俾護其喪歸葬焉宋史

陳省華字善則閬中人至道初拜祠部員外郎知蘇州賜金紫

時遇水災省華復流民數千戶孳者悉瘞之詔書褒美宋史

裴莊字端已閬中人在蜀以明經及第真宗即位以河南轉運

使移知蘇州咸平二年命巡撫江南景德初安撫兩浙莊有

吏幹太宗獎其忠讜多所聽納宋史舊志此下有陳彭年傳今刪

孫冕字伯純新淦人咸平中為兩浙轉運使天禧中以太中大

夫禮部侍郎直史館知蘇州治獄不濫斷訟如神弛張在已

無所吐茹吏畏而民愛之嘗病癰州人爭為詣佛寺祈福復

立生祠萬壽寺甫及引年大書一詩於廳壁拂衣歸九華山

朝廷高其風許再任召之不起盧志

徐爽字武卿建安人祥符中進士第一天聖初通判蘇州時東

南大水詔爽與趙賀督治爽周視盡得水利舊跡乃築石塘

九十里建橋十八所復良田數十萬畝疏隱田者二萬六千

戶得苗三十萬塘成遷兩浙轉運使封晉寧侯致仕遂家吳

蘇州府志 卷六十九

中 姑蘇志 舊志此下有章岷傳今刪

王質字子野大名莘人天聖七年為集賢校理通判蘇州知州黃宗旦負材自喜頗以新進少質議事則曰少年乃與丈人爭事耶質曰受命佐君事有當爭職也宗旦雖屢屈折而政事得無失稍德質助已為之加禮宗旦得盜銷鑄者百餘人以詫質質曰事發無迹何從得之曰吾以術鉤出之質愀然曰以術鉤人寘之死地而又喜仁者之政果如是乎宗旦慙服悉緩其獄入朝判尚書刑部吏部南曹乾隆志曰王志堅曰黃宗旦事本出歐陽公碑文宋史質傳用之其吳育傳在郡無一事盧志割前一段入育傳王志因其訛今攷歐集及宋史改正今案吳育傳舊志已言其在郡無一事而傳仍不刪今刪正

范仲淹景祐初出知睦州徙蘇州首建郡學聘胡瑗為師自是蘇學為諸郡倡大水民田不得耕仲淹疏五河導太湖注之海募夫興作未就尋徙明州轉運使奏畱仲淹以畢其役許

之 宋史 餘詳 吳縣人物

蔣堂字希魯宜興人祥符五年進士由越州徙知蘇州代還繼知杭州遷左諫議大夫復徙知蘇州明堂泛恩改給事中堂治杭與蘇俱有遺愛及重臨二州幼艾相攜迎拜道路吳人於虎邱生為立祠明年表還官政朝廷崇禮者碩閱煩事物以小宗伯聽行其志力是時耆者類不即退堂在杭州日業已治第吳下既而得請角巾休舍縉紳高其識平生愛客應

接不倦亦既告老精力尚強佳賓至前清談不廢所居溪館

有芝草產焉卒年七十五贈尚書吏部侍郎孫續胡宿誌墓參吳郡志

盧熊志云初堂徙家吳中守杭時復治溪館將歸休焉既而告老賦隱園詩自號遂翁所居嘗有芝草知州李仲偃名

其地曰靈芝坊舊列人物乾隆道光二志列流寓今以堂因官寓吳文其孫續有傳在名宦故改列名宦焉

張去惑景祐初為平江節度推官是歲秋蘇有水災轉運使委

去惑捍水道朝廷錄功除將作監丞盧志

富巖河南人吳郡志云處州壽田人其祖居吳而葬田占籍焉嚴於丞相弼為叔父登

大中祥符四年第慶歷初出三司戶部判官除刑部郎中知

蘇州嘉祐中以秘書監再守蘇秩滿上章告老既得請將歸

河南吳人爭挽畱父老前日公之惠愛在此邦之人懷思將

無窮願毋去我百歲後吳人謹烝嘗護松檟當世世如桐鄉

朱仲卿也嚴平時固已樂吳中風物之美因畱居不去沒葬

吳縣之寶華山子孫遂為吳郡人程俱富延年墓誌銘參范

志列吳縣人物道光志因之今按程俱誌延年墓云云則明

則嚴初任在慶曆初程誌不言者專就其後言之耳考俱為

宣和間人范公為南宗時人程在范元又墓誌或據其

行狀似較可信故從程而不從范也或疑冊志進士題名大

中祥符四年張師德榜有富嚴名則或因六為吳縣人物而

列焉亦未可定又據傳云曾孫鈞洵元銜登科而進士題

名紹聖元年畢漸榜富鈞四年何昌言富洵宣和六年沈

張伯玉字公達江西人慶曆中為郡從事勵介有守文藝甚高
范文正公深愛重之嘗舉以應制科舉詞云天賦才敏學窮

閻奧善言皇王之治博達古今之宜素蘊甚冲清節自處堪
充應賢良方正直言極諫科乾隆志

杜曾字孝先雷澤人舉進士為蘇州司法參軍明於法律改穎

州團練推官慶曆中選吏部郎中盧志

司馬光字君實夏縣人寶元中除奉禮郎時父池在杭求簽蘇

州判官事以便親許之宋史

蔣續一作結堂之孫也皇祐中簽判平江軍堂卒續自言少孤育

於祖乞服衰以報朝議以堂有子不許遂辭疾謁醫去職行

服嘉祐中復知吳縣事姑蘇志

李仲偃字晉卿江南國主璟孫至和元年以七兵郎中典吳郡

治成辭疾詔以本官分司南京聽家武進吳人飲仲偃和政

去有遺戀後四年告老除太常少卿致仕見胡宿誌墓

沈兼字子達歷太子中舍通判蘇州能名籍甚性好剛遇事果

急不顧計與守爭可否不為少屈重犯轉運使守使相與害

兼入之法除名免官兼歸怡然無趨戚言盧志

李禹卿字君益唐宰相吉甫八世孫舉進士自郢州僉判除通

判蘇州隄太湖八十里為渠益漕運其口蓄水溉田千餘頃

歲饑出羨粟三萬全活萬餘人移通判袁州會知州翁及死

禹卿哀其貧適吳人歸職田錢二十萬立分其半遺及家僚

屬乃亦合錢二十萬以賻遷知澤隨二州既去民懷其恩官

至司農少卿盧志

滕宗諒字子京河南人嘗知涇州范仲淹薦以自代擢天章閣

待制徙慶州坐在涇費公錢降一官徙岳州遷蘇州卒宗諒

尚氣倜儻自任好施與及卒無餘財所涖州喜建學而湖州

最盛宋史

梅摯字公儀新繁人第進士起家大理評事知藍田上元縣徙

知昭州通判蘇州二浙饑官貸種食已而督償頗急摯言借

貸本以行惠乃重困民詔緩輸期慶曆中擢殿中侍御史歷

戶部副使坐事降知海州徙蘇州入為度支副使摯性淳靜

不為矯厲之行政迹如其為人宋史

蔡抗字子直宋城人仁宗時為秘閣校理乞知蘇州州並江湖

民田苦風潮害抗築長堤自城屬崑山互八十里民得立睦

塌大以為利宋史

鞠真卿字顏叔慶曆中守將作監主簿知長洲縣所至有威名

嘉祐中知蘇州政事無他施設而人自憚之庭訟寂然每平

明視事無來者真卿即歸休客至多不及見後自兗州貶南

安軍道過蘇郡人相戒不敢過其泊舟處五日左右不聞人

聲其見憚如此吳郡志引林希逸史舊志此下有黃鑑傳今刪

李清臣字邦直魏人治平二年以祕書郎僉書平江軍判官名

聲籍甚歐陽修薦之得集賢校理宋史

邊珣字仲寶楚邱人歷鹽亭尉以孫沔辟書寫河東路經歷安撫都總管司機宜文字改平江軍節度推官會沔知杭州以事斥珣亦被譴英宗起沔經畧陝西有司亦言珣無罪狀乃復其官始赴平江任崑山旱蝗檄珣督捕瀕海萑葦盤互蝗集其下莫知為計珣命連槌碎根植於上而斃之諸郡取以為法又嘗直盜牛者之寃後其家言輒流涕歷邠州觀察支使揚州觀察推官紹聖三年卒於蘇珣性孝弟與人交有終始在官有能名公卿皆所推重

盧志 舊志此下有潘夙傳今刪

章帖字伯望建州浦城人第進士為兩浙轉運使有威名及知蘇州始下車會暴風湖海之濱民或漂溺帖遣吏巡視賑卹

請蠲田租人不失所鉏治姦吏繩遏浮薄擊沮豪右莫不畏懾政聲流聞詔令再任時議欲大修郡城浚治運河帖務愛民力請罷其役民甚德之

吳郡圖經續記

李夔字斯和其先江南人唐末避亂徙邵武元豐三年進士釋褐調華亭尉轉奉議郎授僉書平江軍節度推官嘗攝郡事適當累政因循之後獄繫甚衆夔命數吏分條其所犯不日皆決遣之遂以無事官至集賢修撰知鄧州兼京西南路安撫使子綱相高宗

盧志

王覲字明叟如皋人元祐中以直龍圖閣知蘇州州有狡吏善刺守將意以撓權前守用是得譏議覲窮其姦狀寘於法一

郡肅然民歌詠其政有吏行冰上人在鏡心之語徙江淮發

運使宋史舊志此下有陳師錫傳今刪

夏日長為郡從事作吳江安民利民濟民三橋以便行者初澄

源鄉並漕河存村九十七家居河南田占河北至是無濟涉

之患盧志

陳幾道東明人為蘇州錄事參軍民有負公府錢自牖出刺弱

吏者度不可免乃行賂以族弟代之幾道正其罪歲大凶承

郡命賑救多所全活盧志

唐充之字廣仁大名人博學善議論有幹局監蘇州酒稅務知

州李孝壽治尚峻猛不任僚屬充之權幕官與之辨論曲直

州人多賴之後守盛章於充之為姻家初相友善時朱勔恃

勢守所歆慕衆多詭隨而充之每著憎嫉之迹守不能堪勔

亦修怨竟以酷法坐罷充之既廢貧困不能北歸寓寶應唯

以讀書教子為事盧志

莊徽字彥猷江都人居宜興政和初兩浙運副二年召還歷徽

猷閣待制知興仁府徙平江郡豪朱勔挾寵蔑視州縣中貴

人緣勔而使冠蓋相望皆能禍福人於齒頰問官吏無不

傾身事之至郡守亦有出其門者徽獨不少假借勔輩深所

畏憚訖不敢讒當勔盛時造乘輿服御之珍命官於浙西諸

郡及下詔斥罷郡人謹呼而旁郡方遷延幸其復徽曰此天

子盛德事人臣當奉承不暇敢願望乎即日結罷在官六年
丐間不允久之提舉洞霄宮卒盧志

賈公望字表之丞相昌朝之孫通判蘇州時朱勔父子方出入

禁中竊弄威權一時奔競之流爭持苞苴唯恐無門而入公

望獨疾之嘗有詩云陽光一銷鑠不復見妖魔勔之子爲浙

西路分司有賜帶之寵公望時衣金紫服適相會於天慶觀

朱見公望所佩魚熟視之公望厲聲叱之曰此是才力得來

非緣花石左右皆錯愕爲其所擠竟停住中吳紀聞舊志此下有李端方傳

今刪

江袞字聖潛衢州開化人大觀中進士五遷宗博降授奉議郎

平江府司兵曹事方臘之亂有商旅數十人入境遑遽郡將

疑爲謀將殺之袞力爭非是得免後知餘杭縣盧志

吳彥璋字德素處州人伯舉長子宣和間平江戶曹弭郡卒之

將變卻朱勔之請託吏部執奏以彥璋曾坐圍田水利不實

御筆勒停繼得旨放罷仕至少卿盧志

湯東野字德廣丹陽人建炎中知平江時所向州兵玩驕吳中

爲甚東野視事信宿兩卒入接婦家取酒不與直毆主人壞

釀器掉臂去東野立斬以徇列營懼肅三年車駕幸杭苗劉

作難明受赦至東野疑之時張浚參贊御營軍事留平江東

野謀於浚欲匿赦不宣浚曰事如此胡可匿且卒徒觖於望

蘇州府志 卷六十九
賜吾徒先受禍矣因與密謀取故府所藏登極赦書置輿中
迎登譙門讀而張之卽捐其階禁毋輒登者而散金帛如常
時郊賚之數人情略定又與浚議勤王會張俊提兵往行在
道遇僞詔還秦鳳師薄城下東野大喜夜叩浚開城納俊師
未幾問使持僞詔令東野斬二張東野慮俊武人易動卽先
攜見浚與偕謁俊斬使者而焚僞詔於是謀益堅貽書抵呂
頤浩於江寧推爲盟主招韓世忠劉光世皆以兵會軍中百
須東野實主之師旣東東野獨爲後備高宗復位以功超拜
徽猷閣待制入爲工部侍郎尋兼權建康府同知樞密院周
望宣撫浙西將屯平江奏言非東野莫可守仍命東野知平

江兼本路安撫使進徽猷閣直學士兼制置使東野度望不
足與成功辭至七八不獲已而行旣至調民夫置守城五壁
部隊官及遣機宜郡彪王彥環用防城免夫錢募士及修治
城壘樓櫓爲戰守具甚悉望無所措畫東野所言悉棄不用
卽以蠟書具所與望議論本末馳奏乞別自將不然祇與俱
死奏十餘上帝敕與望協心同力以扞一方勿與同異金兵
薄城與望俱遁臺臣請正失守之罪上以東野昨累有奏陳
緣事權不專遂致失守與其他棄城不同止落職紹興初復
爲江淮發運使知揚州致仕卒

盧志

胡松年字茂老懷仁人建炎間知平江府未入境貪吏解印歛

迹以興利除害十七事揭於都市百姓便之加徽猷閣待制

奏江防利害召為中書舍人宋史

姜浩字浩然明州人以承信郎監平江府都稅務甫冠入仕厲

志宦業動有可稱建炎中金將陷平江郡人驚奔關者阻之

浩叱吏開關去者不勝計浩殿後幾不免人皆德之及胡松

年為守擇官僚十人日供所事右列中惟浩得與選所陳又

切中時病盧志

李光字泰發上虞人崇寧五年進士知常熟縣朱勔父冲倚勢

暴橫光械治其家僮動怒誠轉運使移台吳江光不為屈勔

終不能害也歷江東安撫大使知湖州時中書舍人任甲先

因奏事上言及輔郡守臣曰湖非控扼之地今平江方擇人

無如李光者授顯謨閣直學士知平江會朝廷以乏軍儲措

置和糴數以萬計委戶部郎中霍蠡使兩浙至郡中光謂之

曰主上自南渡以來屢有約束戒飭科斂今米或可得第未

知本錢安所取辦乎殆有言利之臣惑上聽者光適論奏其

事蠡亟引去疏入有旨降本錢和糴不踰月而畢召拜禮部

尚書卒諡莊簡盧志舊志此下有趙彦俊趙慶孫傳今刪

章誼字宜叟浦城人紹興二年除大理卿宰相奏知平江府帝

曰誼儒者賴其奏讞平恕使民不冤勿令補外六年以龍圖

閣學士自溫州移守平江上言民所甚苦者催科無法稅役

不均強宗巨室阡陌相望而多無稅之田使下戶爲之破產
 乞委通判一員均平賦役時將臨幸供億繁夥誼處之皆當
 理召對賜帶笏帝曰此不足以償卿之勞其勿謝明年復爲
 戶部尙書卒諡忠恪宋史內均賦疏
 依食貨志增入
 仇念字泰然益都人大觀三年進士嘗知廬州屢卻金兵全活
 數州之衆歷知明州湖南安撫使秦檜主和議以念爲異已
 落職起知明州改知平江旋以言罷念端方挺特自初官訖
 通顯無所附麗治郡典軍皆有遺澤美政可紀史稱爲愷悌
 君子乾隆志

向子諲字伯恭臨江人文簡公敏中元孫歷兩浙都轉運使紹

興八年擢徽猷閣直學士知平江府金使議和將入境子諲
 不肯拜金詔乃上章言自古人主屈已和戎未有甚於此時
 宜卻勿受忤秦檜意致仕宋史

周葵字立義宜興人紹興十三年知平江時兩浙運使李椿年
 卽本郡行經界法郡故田租不滿四十萬椿年披榛莽按倉
 碣欲以七十萬爲率葵辨之日記中所言歲儲穀數耳今法
 以穀二斛得米一斛正今日數也可強增耶椿年遂以圖經
 三十萬爲準初葵爲侍御史欲奏論戶部尙書梁汝嘉汝嘉
 致辭於秦檜擬改葵爲起居郎由是出知湖州又易平江葵
 旣以經界事忤椿年椿年還都希檜意奏葵在郡宴金使飲

食臭敗致行人有詞遂落職罷任盧志

蘇師德字仁仲丹陽人魏公頌之孫紹興中為樞密院計議官

時同僚胡銓上書詆秦檜貶竄師德亦株連去國久之通判

平江適王昉知府事揣檜意日窺伺師德師德廉直無所肆

毒未幾周三畏繼响後會康與之以前監杭州太和酒庫盜

官錢坐免落魄來吳三畏雖法家而北客例收郵舊族推食

與衣待之如骨肉與之又挾秦氏子弟為重請出妓趙芷籍

攜去三畏謀之師德師德謂此事乃與之終身之累三畏因

追還芷與之遂憾師德未幾常同卒於海鹽遂誣三畏以庫

金二百賻之且屬師德為文以祭有姦人在位公棄而死之

語檜大怒命中丞俞堯弼劾三畏落職併罷師德又委提舉

王鈺鞠之獄上雖無左驗師德送汀州編管子玘勒停同師

德之壻玘之婦翁也或云師德同之壻盧志參姑蘇志

有誤壻疑作子今案汪應辰誌常同墓云初公與康與之並

鄰居與之以里中子弟謁公於湖以養母為請公創一檢察

御書之員月朔緝錢三萬俾奉甘旨與之乃不以為養公聞

之愀然因採取數月徑致其母與之鞅鞅去而之平江求一

妓女於知府事周三畏而通判蘇師德公亞壻也知公絕與

之止而勿與與之望公及二君迺告於檜曰常某死三畏屬

師德為文祭之有日姦臣在位公棄而死檜震怒命丞俞

堯弼劾三畏錮職命提舉浙西茶鹽公事王玘鞠師德與其

蕭燧字照鄰新喻人紹興十八年進士第授平江府觀察推官
時秦檜親黨密告燧秋試必主文漕臺燧詰其故曰丞相有

子就舉欲以屬公燧怒曰初仕敢欺心耶檜懷之既而被檄

秀州至則員溢就院易一員往漕闈秦熺果中前列秩滿當

為學官避檜調靜江府察推而歸宋史

孟忠厚字仁仲其先洛州人隆祐太后兄子也紹興中以係宦

軍節度使判平江府改判紹興忠厚避遠權勢不敢以私干

朝廷秦檜當國親姻扳援以進忠厚與檜為僚壻獨與之忤

帝以太后擁佑故眷忠厚特優宋史

蔣璨字宣卿宜興人樞密之奇從子以戶部侍郎除集賢院修

撰知平江府進敷文閣待制右太中大夫平江素號難治璨

祭戢姦偷鉏刈強梗植善柔拊貧弱獄市為清諸軍牧馬有

廢屋數百區茨以茅竹歲一更之用財與力皆出於民璨請

出內帑金佐其費掄巨材陶瓦覆之堅壯可支數世州人歡

呼相率詣北禪寺作佛事以報諸將持人為兵補軍籍率用

大舟往來漕河無人處道遇強壯少年束縛鉗梏之惡少利

其貨通為囊橐囚閉柵中無脫者璨盡得其姓名窮治株穴

捕寘諸法其事遂絕水潦大饑詔發常平粟璨調十二萬石

計道里遠近視男子婦人老幼強弱分日異處各有法無餓

者已而長洲鬻獄璨與諸司皆坐貶降右中大夫提舉洪州

玉隆觀璨在郡時年已七十日閱訟牒百餘紙雖精練少年

不能過作韋白劉三賢祠以示邦人尊賢尚德之意卒贈右

正議大夫

盧志

任盡言字元受眉州人右正言伯雨之孫通判平江紹興三十年除京西運判先是陳正同在平江弛縱不治盡言能助之朝廷錄其勞故有是命既而盡言乞至都堂白事自陳母老不願居邊郡尋改淮東提舉

盧志

朱翌字新仲龍舒人忠靖公勝非之孫以祕閣修撰知平江府擢節浮費積緡錢四十萬於帑藏高宗視師江上後守洪遵以獻有詔獎諭

盧志

洪遵字景嚴鄱陽人禮部尚書皓次子高宗朝歷中書舍人試吏部侍郎紹興三十年平江湖秀三州水無以輸秋苗有司

抑令輸麥遵言麥價殊不在米下民困如是奈何指夏以爲秋衍一以爲二使擠溝壑乎願量取其半而被水害者悉免之三十一一年完顏亮命其尚書蘇侂衡由海道窺二浙朝廷以浙西副總管李寶禦之寶駐兵平江守臣朱翌素與寶異朝議以遵嘗薦寶乃命遵知平江時步帥李捧請斷吳江橋或議塹常熟福山以限敵騎者遵曰審爾是棄吳以西耶凡堂帖與監司符移皆留不行及寶以舟師擣膠西凡資糧器械舟楫皆遵供億寶成功而歸遵之助爲多車駕幸金陵衛士丐索無藝他郡隨與不虞至吳乃相告曰內翰在此汝毋復然先是朝廷慮商船爲敵用悉拘入官並海縣團華巨艦

募水手民兵皆繫畱未得去遵因對論之以船還商而聽水

手自便吳人德之孝宗即位拜翰林學士承旨宋史內時步帥李捧至

皆畱不行一段從盧志增

張孝祥字安國烏江人孝宗即位以集英殿修撰知平江府務

煩劇孝祥剖決庭無滯訟屬邑大姓並海囊橐為姦利孝祥

捕治籍其家得穀粟數萬明年吳中大饑迄賴以濟張浚薦

召赴行在除中書舍人宋史

沈介字德和德清人孝宗時歷兵部尚書再知平江上諭以平

江輔郡極難其人知卿政事特加遴選當為朕撫卹百姓均

財節用使恩威並施如常平錢米以備凶荒訓兵令精不必

增補至於兵器亦令堅緻其眷遇如此又知成都所涖繁劇

綽有餘暇滑敏避云盧志

姚穎字洪卿慶元府人淳熙五年對策第一八年以授書郎求

外補參政周必大欲以郡處之固辭添差通判平江府既至

官恪其職業有所剖析明見毫末吳江二豪訟久不決部使

者知穎通明以是委之穎揣其情必持縣短長有難言之隱

檄令逮之不報趣之果以豪強未易追逮為言穎詰之曰張

官置吏非以治貧弱也正欲制此曹爾此而不懲焉用州縣

卒窮竟其事闔郡悚服張公杓之領常平也嘗護使客夜分

抵館舍穎偶在告攝事官不集張公怒將劾之懇而求救穎

不許恚恨而去徐為申理事竟得釋而斯人不知也十年秋旱甚齋戒祈禱心形俱瘦由是得疾疾且革語家人以二親之養不伸君父之恩未報為終身恨十月甲戌卒於官袁熒行狀劉洵直字子浩莆田人性至孝有德望歷紹興府教授虞允文等薦通判平江同列多貴遊豪縱洵直以儒素道誼禮法開警之久悉感厲時部使者得旨興水利檄與共事洵直辭曰是役非鄭渠召埭之比已而同列代督役受賞進秩隨復鐫去識者服其先見盧志舊志此下有劉之華傳今刪高溶字慶遠宣仁后族初調平江糧料院通判軍府事長官如父兄職守不便立治亟改郡有勢家圍田壅下流溶視水勢

所向廢之人不敢怨移知荆門軍官至司農少卿盧志

沈虛中字太虛廣德人紹興間平江儀曹掾攝郡事會軍中有謀變者虛中挺身造其營語以禍福白郡守開府庫贍給之皆驩呼投甲論功就擢僉判時丞相朱勝非充御營使辟置幕府多所裨贊累遷吏部尚書一云紹興中有潰卒謀於市守伴倉卒遽亡虛中攝府事移文主將梟一人以令眾軍乃不譁丞相呂頤浩張浚聞之召赴都堂議論就擢僉判盧志

沈度字公雅真州人隆興二年以考功郎除直秘閣知平江乾道二年七月召赴行在上曰甲申之歲委卿守吳門未幾治行昭著果如朕所料可謂得人又詢吳中歲事如何具以豐穰對上曰二年以來水澇軫憂惟恐懼修省以百姓為念耳

度奏臣初到郡水歉糴食荷陛下捐四萬餘石馬料以賑濟

全活甚衆上曰正賴良郡守措置漢宣帝有云與我共理者

其惟良二千石乎卽以爲中書門下省檢正諸房公事

盧志

姚憲字令則岷人父舜明欽宗朝監察御史憲以父任累官知

秀州浙西大水蘇常尤甚憲請輸粟萬斛以賑之上賜書獎

諭除提舉浙西常平遷提刑又以直秘閣知平江時羣盜毛

鼎等出沒海道爲商民害召捕弗獲朝命專以屬憲不數月

悉擒之除兩浙轉運判官

盧志 舊志此下有徐嘉傳今移流寓

汪應辰字聖錫玉山人紹興五年進士第孝宗時以端明殿學

士知平江韓玉被旨揀馬過郡應辰簡其禮玉歸譖之於上

曰臣所過州縣未有若平江之不治者上怪之平江米綱至

有折閱事遂貶秩力疾請祠應辰剛方正直學術精醇惜不

盡其用

宋史

趙善擇字守道寓居金壇乾道進士第任平江司戶廉公不私

物莫能奪而疾惡良甚部使者郡守見之必竦然起敬平江

府添差司戶柴某貪濁善擇疾之反以其罪去爲湖州錄事

參軍卒

盧志

邱密字宗卿江陰人孝宗時知華亭縣捍海堰廢且百年鹹潮

歲大入壞並海田蘇湖皆被其害密至海口訪遺址已淪沒

乃奏勅築三月堰成三州爲鹵復爲良田除直秘閣知平江

府歷知吉州鄂州江西轉運判官提點浙東刑獄進直徽猷

閣再知平江改兩浙轉運副使

宋史

陳晞點字子與青田人淳熙中任從事郎平江府觀察推官樞

密邱審爲守屢以職事爭辨密或陽怒折之晞點立退屏息

俟其少霽執論如初至於再三竟不能奪自爾晞點書擬望

而許之提舉羅點兼府事舉兩司事無大小咸以屬之行荒

政修水利決積訟晞點悉左右之

盧志

韓彥古字子師延安人蘄王世忠之子兩知平江時酒禁甚嚴

士大夫家亦無敢醞造有門卒捕一婦人肩輿中斗酒入門

者婦云自郊外父母家持歸姑老病以其無灰可爲藥餌非

敢酤賣也問兵士汝何從而獲曰告我者舁轎之夫彥古曰

人奴而訐其主乎杖僕而遣之又士族之母訟其夫前妻之

子者以衣冠扶掖而來乃其所生子也彥古曰事體頗重當

略懲之母曰業已論訴願明公據法加罪彥古曰若然必送

獄而後明汝年老不能理對汝遣扶掖之子就獄與證徐議

所決母良久云乞文狀歸家俟其不悛卽再告理由是不敢

復至郡有士人持吏短長州將下車必先投狀以占能否彥

古至其人亦來彥古曰此狀汝不能爲必有吏人教汝者其

人錯愕卽以實告追吏杖之一郡以爲神明

盧志

莫漳湖州月河望族也淳熙初知仁和縣時有出入德壽宮者

蘇州府志 卷之六十一
恃勢強梗陵蔑良善屢追不出漳衣綠袍候於宮之外門俟其出擒而撻之高宗怒孝宗降漳一官未幾復治一人再降一秩仍畱任數月平江缺守宰執進擬孝宗曰朕有其人遂除漳院轄以承議郎知平江盧志
王佐字宣子山陰人南省廷對第一自揚州徙知平江政聲第一尤長於聽訟有小民告進士鄭安國酒逮捕其人云安國非不知冒觸刑憲老母飲藥須酒之無灰者故蓄藏之佐問酒畱牀腳笈中告者何自知之必汝家有人漏言之耳安國以幼婢對竟得婢與告者姦狀冀事倉卒逃去俱杖脊遣之而釋安國聞者稱快改知臨安府進工戶二部尙書盧志舊志此

下有葉適傳今刪

謝師稷字務本邵武人以右司郎中除集英殿修撰知平江前守恃其富饒率多妄用未幾反病不足師稷擢節浮費一以愛人爲務初無橫取未滿歲積四十萬緡以郡城圯奏請修繕遂爲壯觀盧志

趙彥操宗室子也淳熙中以祕閣修撰使江西知平江府郡當孔道事緒萬端窮日力不給彥操治尙靜簡不爲捷疾以聳見聞建御書閣風化庠序未嘗汲汲浚民而財用羨溢寬弛虛錢緡十四萬米四萬六千斛歲滿以右文殿修撰再任又躋集英徙鎮江未上改婺州盧志

方導字夷吾淳熙十二年通判平江郡務素劇關決間暇外臺

多屬以事無不得其平兩攝府事尤為得體嘗苦早躬禱陽

山龍祠有隨車之應秩滿知沅州

盧志舊志此下有李大性傳今刪

沈作賓字賓王歸安人寧宗時除龍圖閣待制知平江府請得

節制許浦水軍郡有使臣故海盜也作賓使招誘其黨既至

慰勉之賜衣物又得強勇者幾千人置將以統之號曰義士

復募郡城內外惡少亦幾千人號曰壯士衣糧器械皆視官

軍而輕捷善鬪過之於是海道不警市井無譁

宋史

趙希懌字伯和燕王八世孫性簡重不妄言笑以江西安撫轉

運除知平江覈財用出入削浮費無藝者郡多舞文吏未及

期年苗嫫髮櫛官寺肅清以治行進直學士尋以病告移知

太平州

盧志

趙彥櫛字文長秦悼王七世孫乾道二年進士第累遷湖廣總

領知平江府郡之崑山並大海盜出沒莫可蹤跡彥櫛奏分

其半置嘉定縣屯兵以守又鑿錦帆涇通運河以便舟楫將

增隍為城而邊遽少緩且以病告轉寶謨閣待制嘉定十一

年卒官

乾隆志

趙汝述字明可太宗八世孫由進士累官刑部尚書知平江下

車宣布德意時許浦水軍顧涇民兵未霑正月受寶之賜汝

述請以安邊庫八萬六千緡均給之郡雖稱富饒仍歲告匱

汝述務以節用卹民爲急城圯不修條其工費當緡錢二十四萬米萬有四千斛奏請於朝以殿步司二軍佐其役方具畚缶會病卒

盧志

吳淵字道父寧國人寧宗時以直煥章閣知平江府兼節制許浦水軍提點刑獄會衢嚴盜起警報至調遣將士招捕之殲其渠魁散其支黨以功爲樞密院檢詳文字兼國史院編修官理宗時遷兵部尙書再知平江兼浙西兩淮發運使歲大稔因淵全活者四十二萬三千五百餘人淵有才略事功迄濟所至興學養士然政尙嚴酷籍滅豪橫時有蜈蚣之謠弟潛亦數諫止之

宋史

王遂字去非一字穎叔金壇人理宗時知平江府遂至郡以崇學校寬民力抑豪強正風俗爲務會兩倅六縣合賦詩勉勵時詣學爲諸生講說吳中理學愈盛洞庭西山村民徐汝賢以詐惑衆自言能出神使人見神魂游於空中及死者魂魄見朱簾之內掠人財賄誘人妻妾爲害數十年遂鞠之殊無異狀乃毀其家壇祀黥面鞭背投之盤門水中又爲辨惑文云徐汝賢自號水仙太保今在水中不仙且與魚蝦爲侶如有妖怪願以一身當之又民間七月十五日多設盂蘭盆會遂作文鏤板以禁謂孝子順孫若從其法則自以祖父爲餓鬼心忍之乎以時思親當祭諸廟由是汚俗爲之不變

盧志

吳潛字毅夫寧國人嘉定十年進士第一歷工部侍郎知慶元

府改知平江條具財計彫敝本末以寬郡民與轉運使王埜

爭論利害授寶謨閣待制提舉太平興國宮宋史

趙與憲字德淵太祖十世孫希輝子寓處州之青田嘉熙三年

直敷文閣知平江兼淮浙發運使特置司領其事自與憲始

四年郡中饑分場設粥以寓公方萬里為人所推敬委請董

役全活者數萬人寶祐三年以觀文殿學士再守郡行鄉飲

射禮於學宮復修節殿堂齋廬廣弦誦以嚴教養學官弟子

為立生祠明年兼提刑六年除江東安撫使知建康府景定

初再知平江丐祠盧志 乾隆志曰王志堅曰按宋史與憲所至急於財利幾於聚斂之臣矣盧志此

傳與史大異當必有所受之今亦不敢異也

陳塏字子爽嘉興人歷右司郎官進直龍圖閣浙西提點刑獄

後以右文殿修撰知平江府兼淮浙發運使戶部侍郎趙必

愿舉塏最詔特轉一官遷太府卿官至端明殿學士卒諡清

毅塏屢歷麾節軍民愛戴幕客盛多又樂薦士宋史

鄭士鉉字鳴道郵人久歷邊陲素諳兵政宰公安民尤安之生

為立祠歷添差通判平江除將作監簿當官不畏強禦公平

無私姑蘇志

謝堂字升道天台人丞相深甫曾孫淳祐三年由籍田令除直

寶章閣添差通判平江年踰弱冠敏給過人憲使驟以獄事

屬之有一案而直八十餘家之枉者累官樞密使銀青榮祿大夫盧志

徐鹿卿字德夫豐城人淳祐中遷右文殿修撰知平江府兼發運副使力丐祠召權兵部侍郎鹿卿居官廉約清峻毫髮不妄取一廬僅庇風雨宋史

吳樵淳祐中平江節度推官賢而有才敏於吏事憲司請入僉幕多所裨贊諸司交薦之嘗謂人曰樵居官既久深知吳風吳人尚奢而爭勝所事不切寧拚百萬錢嫁女不能拚十萬錢教子弟不知書識字但廣置田宅計較微利殊不思異時反貽子孫不肖之害故人以歎目之蓋以此也盧志

趙與嘗字仲父秀安僖王五世孫寓籍歸安寶祐初直寶章閣浙西提刑二月兼提舉十月知平江府景定四年九月復起知平江府兼提刑十一月兼提舉咸淳元年卒其友禮部侍郎東平劉震孫誄曰與嘗於時為循吏於朝為名臣於國為信厚公族世以為知言盧志

王應麟字伯厚慶元府人九歲通六經淳祐元年第進士從王堃受學調西安主簿差監平江百萬東倉調浙西提舉常平茶鹽主管帳司部使者鄭霖異待之寶祐四年中博學宏詞科累遷禮部尚書宋史舊志此下有方逢辰王煥傳今刪

包恢字宏父建昌人由進士歷除直顯文閣浙西提點刑獄是

時海寇爲亂恢單車就道調許浦澈浦分屯建砦一旦集諸軍討平之景定中進華文閣直學士知平江兼發運使至郡聞迎官供帳皆敷抑市肆民不能堪首以所得供堂緡錢盡償其直郡中酒課常時爲守者公費外悉以自歸恢節縮冗濫以其贏補九任度支逋欠及支給許浦兵糧去官之日府庫剩錢六百餘萬郡豪有奪民包舉田寄公租誣上者恢上疏以爲小民祈天永命之一事帝覽奏惻然罪任事者卽歸民田時派買公田恢奉行稍過頗失時望召赴闕奏事移知紹興府恢所至破豪猾去姦吏治蠱獄理逋負政聲赫然卒贈少保謚文肅

盧志 乾隆志曰王志堅曰按宋史賈似道傳包恢知平江奉行公田之法至以肉刑從

事復以楮錢作銀關以一準十八界會之三自鑄其印文如賈字狀行之十八界廢不用銀關行物價益踊楮益賤恢之醜如此今志言奉行稍過何也相傳旣久未便遽刪姑附所見於此

趙順孫字和仲縉雲人咸淳四年以顯文閣待制知平江兼發運使先是郡庾赤立率以夏初徵民租順孫謂古者十月納禾稼今先期半載民何以堪僉曰此例行之三十年不然將有匱乏之憂順孫不聽首以俸入及例卷所供助糴本抑浮費以繼之糴幾二十萬斛迄免預徵郡大治創學道書院俾諸生肄業焉五年召爲吏部侍郎

盧志

常懋字長儒武康人顯謨閣學士同曾孫也淳祐七年舉進士調常熟尉公廉自持不畏強禦部使者交薦之調婺州推官

臨安尹馬光祖薦於朝辟差平江府百萬倉檢察不受和糴
事例戢吏卒苛取後以集英殿修撰知平江府值旱故事郡
守得緡錢十五萬懋悉以爲民食軍餉助蠲苗九萬稅十三
萬版帳十六萬又蠲新苗二萬八千大寬公私之力飛蝗幾
及境疾風飄入太湖節浮費修府庫既代有送還事例自給
吏卒外餘金萬楮悉不受吏驚曰人言常侍郎不愛錢果然
改浙東安撫使宋史

文天祥字宋瑞一字履善廬陵人寶祐丙辰進士第一歷知贛
州德祐元年謀報元師渡江詔諸路勤王天祥以兵二萬至
臨安除浙西江東制置使兼江西安撫大使知平江府常州

告急遣麻士龍尹玉洎淮將張全曾全等往援之戰於五牧
曾全等先遁諸軍敗績張全不援麻士龍尹玉皆死之平江
大震天祥斬曾全以徇未幾陷无屠其城守將劉師勇來奔
會獨松關告急畱夢炎陳宜中議棄平江趣天祥入衛移守
餘杭天祥猶豫未決兩府劄至乃委印通判王矩之時督府
遣環衛王邦傑援常畱平江因責邦傑以城守天祥去平江
數日邦傑開門迎降都人大駭議天祥棄平江天祥出兩府
劄榜之朝天門衆始定進資政殿學士浙西江東制置大使
兼江西安撫大使二年正月伯顏軍至高亭山天祥詣軍前
講解伯顏畱不遣峻都嘗問曰何以去平江天祥曰有詔趣

入衛問兵若干人對曰五萬峻都嘆曰天也使丞相在平江

必不降但累城內百姓耳

盧志 乾隆志曰盧志據宋史本傳并劉岳申所作傳詳錄其在平

江事畧其餘其文較宋史為明備故採之

張世傑范陽人歸宋累功至保康軍承宣使德祐初總都督府

兵遣將四出取浙西諸郡復平江安吉廣德溧陽諸城兵勢

頗振七月與劉師勇諸將大出師焦山兵敗奔圖山上疏請

濟師不報十月進沿江招討使改制置副使兼知節度使知

平江尋亦召入衛加檢校少保

宋史

許應元字長卿臨安人登第授平江司戶參軍知府文天祥辟

置幕下國亡不娶不仕教授以給養母及弟母喪盡禮時人

高其誼

盧志

